

論說

新民說四

中國之新民

第六節 論國家思想

人羣之初級也。有部民而無國民。由部民而進爲國民。此文野所由分也。部民與國民之異安在。曰羣族而居。自成風俗者。謂之部民。有國家思想。能自布政治者。謂之國民。天下未有無國民而可以成國者也。

國家思想者何。一曰對於一身而知有國家。二曰對於朝廷而知有國家。三曰對於外族而知有國家。四曰對於世界而知有國家。

所謂對於一身而知有國家者何也。人之所以貴於他物者。以其能羣耳。使以一身子然孤立於大地。則飛不如禽。走不如獸。人類之翦滅亦既久矣。故自其內界言之。則太平之時。通功易事。分業相助。必非能以一身而備百工也。自其外界言之。則患難之際。羣策羣力。捍城禦侮。尤非能以一身而保七尺也。於是乎國家起焉。國家之立。由於不

得已也。即人人自知僅恃一身之不可而別求彼我相團結相補助相裨救相利益之道也。而欲使其團結永不散補助永不虧裨救永不誤利益永不窮則必人人焉知吾一身之上更有大而要者存每發一慮出一言治一事必常注意於其所謂一身以上者。此兼愛主義也。雖然即謂之爲我主義亦無不可。蓋非利羣則不能利己。天下之公例也。苟不爾則團體終不可得成而人道或幾乎息矣。此爲國家思想之第一義。

所謂對於朝廷而知有國家者何也。國家如一公司朝廷則公司之事務所而握朝廷之權者則事務所之總辦也。國家如一村市朝廷則村市之會館而握朝廷之權者則會館之值理也。夫事務所爲公司而立乎抑公司爲事務所而立乎。會館爲村市而設乎抑村市爲會館而設乎。不待辨而知矣。兩者性質不同而其大小輕重自不可以相越。故法王路易第十四「朕即國家也」一語至今以爲大逆不道。歐美五尺童子聞之莫不唾罵焉。以吾中國人之眼觀之或以爲無足怪乎。雖然譬之有一公司之總辦而曰我即公司有一村市之值理而曰我即村市試思公司之股東村市之居民能受之否耶。夫國之不可以無朝廷固也。故常推愛國之心以愛及朝廷是亦愛人及屋愛屋

及鳥之意云爾。若夫以鳥爲屋也。以屋爲人也。以愛屋愛鳥爲即愛人也。寔假愛鳥而忘其屋。愛屋而忘其人也。欲不謂之病狂不可得也。故有國家思想者。亦常愛朝廷而愛朝廷者。未必皆有國家思想。朝廷由正式而成立者。則朝廷爲國家之代表。愛朝廷即所以愛國家也。朝廷不以正式而成立者。則朝廷爲國家之僞賊。正朝廷乃所以愛國家也。此爲國家思想之第二義。

所謂對於外族而知有國家者。何也。國家者對外之名詞也。使世界而僅有一國。則國家之名不能成立。故身與身相並而有我身。家與家相接而有我家。國與國相峙而有我國。人類自千萬年以前。分孳各地。各自發達。自言語風俗。以至思想法制。形質異。精神異。而有不得不自國。其國者焉。循物競天擇之公例。則人與人不能不衝突。國與國不能不衝突。國家之名立之。以應他羣者也。故眞愛國者。雖有外國之神聖大哲。而必不願服從於其主權之下。寧使全國之人流血粉身。靡有子遺。而必不肯以絲毫之權利讓於他族。蓋非是則其所以爲國之具先亡也。譬之一家。雖復室如懸磬。亦未有願他人入此室處者。知有我故。是故我存此爲國家思想第三義。

所謂對於世界而知有國家者何也。宗教家之論。動言天國。言大同。言一切衆生。所謂博愛主義。世界主義。抑豈不至德而深仁也哉。雖然。此等主義。其脫離理想界而入於現實界也。果可期乎。此其事或待至萬數千年後。吾不敢知。若今日將安取之。夫競爭者。文明之母也。競爭一日停。則文明之進步立止。由一人之爭競。而爲一家。由一家而爲一鄉族。由一鄉族而爲一國。一國者團體之最大圈。而競爭之最高潮也。若曰。並國界而破之。無論其事之不可成。即成矣。而競爭絕。毋乃文明亦與之俱絕乎。況人之性。非能終無競爭者也。然則大同以後。不轉瞬而必復。以他事起競爭於天國中。而彼則已返爲部民之競爭。而非復國民之競爭。是率天下人而復歸於野蠻也。今世學者。非不知此主義之爲美也。然以其爲心界之美。而非歷史上之美。故定案以國家爲最上之團體。而不以世界爲最上之團體。蓋有由也。然則言博愛者。殺其一身之私。以愛一家。可也。殺其一家之私。以愛一鄉族。可也。殺其一身一家一鄉族之私。以愛一國。可也。國也者。私愛之本位。而博愛之極點。不及焉者。野蠻也。過焉者。亦野蠻也。何也。其爲部民而非國民一也。此爲國家思想第四義。

耗矣。哀哉。吾中國人之無國家思想也。其下焉者。惟一身一家之榮瘁。是問其上焉者。則高談哲理。以乖實用也。其不肖者。且以他族爲虎。而自爲其俵。其賢者。亦僅以堯跖爲主。而自爲其狗也。一以言乎第一義。則今日四萬萬人中。其眼光能及於一身以上者。幾人。攘而往。熙而來。苟有可以謀目前銜銖之私利者。雖賣盡全國之同胞。以圖之。所弗辭也。其所謂第一等人者。則獨善其身。鄉黨自好者。流也。是即吾所謂通羣負而不償者也。見第五節夫獨善之與私惡。其所以自立者。雖不同。要其足以召國家之衰亡。一也。一以言乎第二義。則吾中國相傳天經地義。曰忠曰孝。尙矣。雖然。言忠國。則其義完。言忠君。則其義偏。何也。忠孝二德。人格最要之件也。二者缺一時。曰非人。使忠而僅以施諸君也。則天下之爲君主者。豈不絕其盡忠之路。生而抱不具人格之缺憾耶。則如今日美法等國之民。無君可忠者。豈不永覓屏於此德之外。而不復得列於人類耶。願吾見夫爲君主者。與爲民主國之國民者。其應盡之忠德。更有甚焉者也。人非父母無自生。非國家無自存。孝於親。忠於國。皆報恩之大義。而非爲一姓之家奴。走狗者所能冒也。而吾中國人以忠之一字。爲主僕交涉之專名。何其慎也。君之當忠。更甚於民。何也。民之忠也。僅在報國之一

義務耳。君之忠也。又兼有不負付託之義務。安在其忠德之可以已耶。夫孝者子所對於父母之責任也。然爲人父者何嘗可以缺孝德。父不可不孝。而君顧可以不忠乎。僅言忠君者。吾見其不能自完其職也。以言乎第三義則吾國歷史彌天之大辱。而非復吾所忍言矣。計自漢末以迄今日。凡一千七百餘年間。我中國全土爲他族所占領者二百五十八年。其黃河以北乃至七百五十九年。今列其種族及時代爲表如左。

國名	國	祖	種族	都	今地	興起年代	滅亡年代
漢	劉淵		匈奴	平陽	山西平陽府	三〇四年	三二九年
成	李雄		巴氏	成都	四川成都府	三三七年	三四七年
後趙	石勒		羯	鄴	直隸順德府	三一八年	三五一年
燕	慕容皝		鮮卑	盛樂	山西大同府	三三七七年	三七〇年
代	拓跋猗盧		鮮卑	盛樂	山西大同府	三〇九年	三七六年
秦	苻健		氏	長安	陝西西安府	三五一年	三九四年
後燕	慕容垂		鮮卑	中山	直隸定州	三八三年	四〇八年
後秦	姚萇		羌	長安		三八四年	四一七年
西燕	慕容沖		鮮卑	長子	山西潞州府		三九四年
西秦	乞伏乾歸		鮮卑	苑川	甘肅鞏昌府	三八五年	四三一年

後涼	呂光	氏	姑臧	甘肅涼州府	三八六年	四〇三年
南燕	慕容德	鮮卑	廣固	山東青州府	三九八年	四一〇年
南涼	秃髮傉檀	鮮卑	廉川	甘肅西甯府	四〇二年	四一四年
北涼	沮渠蒙遜	匈奴	張掖	甘肅甘州府	四〇七年	四三九年
大夏	赫連勃勃	鮮卑	統萬	甘肅鞏夏府	三八六年	四三一年
後魏	拓跋珪	鮮卑	平城	山西大同府	三八六年	五六四年
契丹	完顏阿骨打	五代時燕雲十六州	汴	河南開封府	一一二六年	一二三四年
金	完顏阿骨打	女真	汴	河南開封府	一一二六年	一二三四年
元	成吉思	蒙古	北京	直隸順天府	一二七七年	一三六七年

嗚呼。以黃帝神明華胄所世襲之公產業而為人終而奪之者屢見不一見而所謂黃帝子孫者迎壺漿若崩厥角紆青紫臣妾驕人其自嚙同類以為之盡力者又不知幾何人也。陳白沙崖山弔古詩有云一鏑功奇石張宏範不是胡兒是漢兒。嗟夫嗟夫晉宋以來之漢兒其豐功偉烈與張宏範後先輝映者何啻千百。白沙先生無乃所見不廣乎。國家思想之銷亡。至是而極。一以言乎第四義則中國儒者動曰平天下治天下。

其尤高尚者。如江都繁露之篇。橫渠西銘之作。視國家爲眇小之一物。而不屑厝意。究其極也。所謂國家以上之一大團體。豈嘗因此等微妙之空言。而有所補益。而國家則滋益衰矣。若是乎。吾中國人之果無國家思想也。危乎痛哉。吾中國人之無國家思想。竟如是其甚也。

吾推其所以然之故。厥有二端。一曰知有天下而不知有國家。二曰知有一己而不知有國家。

其誤認國家爲天下也。復有二因。第一由於地理者。歐洲地形。山河綺錯。華離破碎。其勢自趨於分立。中國地形。平原磅礴。阨塞交通。其勢自趨於統一。故自秦以後。二千餘年。中間惟三國南北朝三百年間。稍爲分裂。自餘則皆四海一家。即偶有割據。亦不旋踵而合并也。環其外者。雖有無數蠻族。然其幅員。其戶口。其文物。無一足及中國。若葱嶺以外。雖有波斯印度希臘羅馬諸文明國。然彼此不相接。不相知。故中國之視其國。如天下。非妄自尊大也。地理使然也。夫國也者。以對待而成。中國人國家思想發達。所以較難於歐洲者。勢也。第二由於學說者。戰國以前。地理之勢未合。羣雄角立。而國家

主義亦最盛。顧其敝也。爭地爭城殺人盈野塗炭之禍。未知所極。有道之士怒然憂之。矯枉過正以救末流。孔子作春秋務破國界歸於一王以文教太平。孟子謂天下惡乎定。定於一。其餘先秦諸子如墨翟宋牼老聃關尹之流。雖其哲理各自不同。至言及政術則莫不以統一諸國爲第一要義。蓋救當時之敝。不得不如是也。人心之厭分爭已甚。遂有嬴政劉邦諸梟雄接踵而起。前此書生之坐論忽變爲帝者之實行。中央集權之勢遂以大定。帝者猶慮其未固也。乃更燔百家之言。錮方術之士。而務刺取前哲緒論之有利於己者。特表章之以陶冶一世。於是國家主義遂絕。其絕也未始不由孔墨諸哲消息於其間也。雖然。是固不可以爲先哲咎。彼其時固當然。而扶東倒西。又人類之弱點而不能避者也。佛以說法度衆生。而法執者謂執泥於法也。即由法生惑焉。後人狃一統而忘愛國。又豈先聖之志也。且人與人相處而不能無彼我之界者。天性然矣。國界既破而鄉族界身家界反日益甚。是去十數之大國而復生出百數千數無量數之小國。馴至四萬萬人爲四萬萬國焉。此實吾中國二千年來之情狀也。惟不知有國也。故其視朝廷不以爲國民之代表。而以爲天帝之代表。彼朝廷之屢易而不動其心也。非

愬也。蒼天死而黃天立。白帝殺而赤帝來。於我下界凡民有何與也。稟受於地理者。既若彼。熏習於學說者。又若此。我國人之無國家思想也。又何怪焉。又何怪焉。雖然。知有天下而不知有國家。此不過一時之謬見。其時變則其謬亦可自去。彼謬之由地理而起者。今則全球交通。列強比鄰。閉關一統之勢破。而安知股憂之不足以相啓也。謬之由學說而起者。今則新學輸入。古義調和。通變宜民之論昌。而安知王霸之不可以一途也。所最難變者。則知有一己而不知有國家之弊。深中於人心也。夫獨善其身。鄉黨自好者。畏國事之爲己累而逃之也。家奴走狗於一姓而自詡爲忠者。爲一己之爵祿也。勢利所在趨之若蟻而更自造一種道德以飾其醜而美其名也。不然則二千年來與中國交通者。雖無文明大國而四面野蠻。亦何嘗非國耶。謂其盡不知有對待之國。又烏可也。然試觀劉淵石勒以來各種人之入主中夏。曾有一焉。無漢人以爲之佐命元勳者乎。昔嵇紹生於魏。晉人篡其君而戮其父。紹靦顏事兩重不共戴天之仇敵。且爲之死而自以爲忠。後世盲史家亦或以忠許之焉。吾甚惜乎。至完美至高尚之忠德。將爲此輩污穢以盡也。無他。知有己而已。已有能富我者。吾願爲之吮癰。有能

貴我者吾願爲之叩頭其來歷如何豈必問也若此者其所以受病全非由地理學說之影響地理學說雖萬變而奴隸根性終不可得變嗚呼吾獨奈之何哉吾獨奈之何哉不見乎聯軍入北京而順民之旗戶戶高懸德政之傘署衙千百嗚呼痛哉吾語及此無皆可裂無髮可豎吾惟膽戰吾惟肉麻忠云忠云忠於勢云爾忠於利云爾不知來視諸往他日全地球勢利中心點之所在是即四萬萬忠臣中心點之所在也而特不知國於此焉者之誰與立也

嗚呼吾不欲多言矣吾非敢望我同胞將所懷抱之利己主義剷除淨盡吾惟望其擴充此主義鞏固此主義求如何而後能真利己如何而後能保己之利使永不失則非養成國家思想不能爲功也同胞乎同胞乎勿謂廣土之足恃羅馬帝國全盛時其幅員不讓我今日也勿謂民衆之足恃印度之土人固二百餘兆也勿謂文明之足恃昔希臘之雅典當其爲獨立國也聲明文物甲天下及其服從他族萎靡不振以至於澌亡而吾國當胡元時代士大夫皆習蒙古文廿二史劄記言之甚詳而文學幾於中絕也惟茲國家吾儕父母兮無父何怙無母何恃兮熒熒淒淒誰憐取兮時運一去吾其已兮思之思

之。兮。及。今。其。猶。未。沫。兮。



法理學大家孟德斯鳩之學說

中國之新民

自一千七百七十八年美國獨立建新政體置大統領及國務大臣以任行政置上下兩議院以任立法置獨立法院以任司法三者各行其權不相侵壓於是三權鼎立之制遂徧於世界今所號稱文明國者其國家樞機之組織或小有異同然皆不離三權範圍之意政術進步而內亂幾乎息矣造此福者誰乎孟德斯鳩也自一千七百七十二年英人於本國禁用奴隸八百三十三年並屬地而悉禁之八百六十五年美國南北戰罷奴制全廢而俄羅斯亦以千八百六十一年行釋放農奴之制於是白種人轄治之地無復一奴隸苟及歲者皆得爲自由民人道始伸而戾氣漸滅造此福者誰乎孟德斯鳩也自白加掠著刑法論爲近世刑法之所本而列國靡然從風廢拷訊之制設陪審之例慎罰薄刑惟明克允博愛之理想遂見諸實事造此福者誰乎孟德斯鳩也孟子曰有王者起必來取法是爲王者師也近世史中諸元哲可以當此語而無愧者

蓋不過數人焉。若首屈一指。則吾欲以孟德斯鳩當之。

孟德斯鳩。法國人也。生於一千六百八十九年。康熙二十八年幼稟天才。讀史有識。稍壯。探究

各國制度法典。並研究法理學。千七百四十年。舉爲本省議會議員。其年入學士會院。益刻苦厲精。研治各學。頗有著述。爲世所稱。千七百四十六年。辭議員職。游歷歐洲諸國。歸國後。益潛心述作。先成羅馬盛衰原因論。英國政體論。兩書。既乃成萬法精理。

(法文原名 *Esprit des Lois*。英文譯爲 *The Spirit of Laws*。譯意言法律之魂也。日本

人譯爲此名。今從之。) 以千七百五十年公於世。蓋作者二十年精力之所集也。此書一出。全國之思想言論。爲之丕變。真有河出伏流。一瀉千里之勢。僅閱十八月。而重印二十一次。云其聲價之高。概可想見。

當法王路易第十四之際。君主專制政體。正極全盛。及其歿後。弊害百出。羣治腐敗。道德衰頹。官廷教會。尤爲蠹政淵藪。然其時學術方進。英國文明之化。日淺流入。於是國民思想漸起。將撥反動力以排政治之專制。抑教會之橫恣者。紛紛然矣。而當時築其壘。煽其流。隱然爲全國動力之主動者。厥有三人。一曰盧梭。二曰福祿特爾。三曰孟德

斯鳩盧氏之說。以銳利勝。福氏之說。以微婉勝。而孟氏之說。以緻密勝。三君子者。軒輊頗難。而用力之多。結果之良。以孟氏爲最。

孟氏之學。以良知爲本旨。以爲道德及政術。皆以良知所能及之至理爲根基。其論法律也。謂事物必有其不得不然之理。所謂法也。而此不得不然之理。又有其所從出之本原。謂之法之精神。而所以能講究此理。窮其本原。正吾人之良知。所當有事也。萬法精理。全書之總綱。蓋在於是。

孟氏曰。凡屬圓。顧方趾。而具智慧者。即可以自定法律。雖然。當其未著定法律之前。自有所謂義不義。正不正者。存所謂事物自然之理也。法律者。即循此理而設者也。若謂法律所令之外。無所謂善。法律所禁之外。無所謂惡。是猶於未畫圓形之前。而云自其中央。達於周邊諸綫。長短相等也。如何而可哉。故理也者。人與人物與物相交接之間。所最適宜者是也。而此理常同一。而無有變。若各邦所說之政法。特施行此理義之條目耳。

又曰。法律者。以適合於其邦之政體及政之旨趣爲主。不齊惟是。又當適于其國之地。

四

勢。及。風。土。之。寒。熱。又。當。適。於。其。國。之。廣。狹。及。與。鄰。邦。相。接。之。位。置。乃。至。土。壤。之。沃。瘠。及。民。之。所。業。或。農。或。牧。或。賈。各。各。相。宜。又。當。適。於。其。國。民。自。由。權。之。廣。狹。及。民。所。奉。之。宗。教。又。當。適。合。於。民。戶。之。多。寡。及。人。民。多。數。之。意。嚮。與。其。性。質。不。寧。惟。是。此。法。律。與。彼。法。律。必。有。相。因。當。求。其。所。以。設。立。之。故。並。創。製。此。法。者。宗。旨。之。所。在。凡。欲。講。究。一。邦。之。法。律。者。必。須。就。此。數。端。悉。心。考。求。未。可。執。一。以。論。也。孟。氏。萬。法。精。理。一。書。即。用。此。法。以。考。察。各。國。之。法。而。論。列。其。得。失。之。林。者。也。其。博。深。切。明。不。亦。宜。乎。

孟。氏。學。說。最。爲。爲。政。治。學。家。所。祖。尙。者。其。政。體。論。是。也。政。體。種。類。之。區。別。起。於。阿。里。士。多。德。而。孟。氏。剖。之。更。詳。其。言。以。爲。萬。國。政。體。可。以。三。大。別。概。括。之。一。曰。專。制。政。體。二。曰。立。君。政。體。三。曰。共。和。政。體。凡。邦。國。之。初。立。也。人。民。皆。僭。伏。于。君。主。威。制。之。下。不。能。少。伸。其。自。由。權。謂。之。專。制。政。體。及。民。智。大。開。不。復。統。于。一。人。惟。相。與。議。定。法。律。而。共。遵。之。是。謂。共。和。政。體。此。二。者。其。體。裁。正。相。反。而。介。於。其。間。者。則。有。立。君。政。體。有。君。以。莅。于。民。上。然。其。威。權。受。法。律。之。節。制。非。無。限。之。權。是。也。

既。明。其。區。別。乃。論。其。得。失。孟。氏。以。爲。專。制。政。體。絕。無。法。律。之。力。行。於。其。間。君。主。專。尙。武。

力以懾其民。故此種之政。以使民畏懾爲宗旨。雖美其名曰輯和萬民。實則斲喪元氣。必至舉其所賴以立國之大本而盡失之。昔有路伊沙奴之野蠻。見樹果纍纍。攀折不獲。則以斧仆其樹而捋取之。專制政治殆類是也。然民之受治于其下者。輒曰。但使國祚尙有三數十年。吾輩且假日媮樂。及吾死後。則大亂雖作。復何恤焉。然則專制國民之姑息偷靡。不慮其後。亦與彼蠶民之斫樹採果者無異矣。

孟氏又曰。凡專制之君主。動曰輯和其民。其實非真能輯和也。何也。以彼奪民自由權。使民畏懼爲本旨故也。夫民者固有求自保之性者也。而畏懼之心與求自保之性。又常不相容。然則專制之國。必至官與民各失其所願望。而後已。無他。其中之機關。本自有相牴牾者存也。故只能謂之苟安。不能謂之輯和。輯和者。人人各有所恃以相處而安其生也。苟安者。一時無戰亂而已。故專制國戶謂太平。其中當隱然含擾亂之種子。

又曰。凡專制之國。必禁遏一切新奇議論。使國民墮然不動。如木偶然。其政府守一二陳腐主義。有倡他義者。則言爲畔道爲逆謀。何也。彼其宗旨固以偷一時之安爲極。則也。以故務剛撻其民。若禽獸然。時時鞭撻之。使習一二技藝以效己用。民既冥頑如禽

六

獸矣。則其中有一極。極惡而善威嚇者。則足以統御之。不寤惟是。乃至不必以人爲君。而治之有餘。昔瑞典王查理第十二。嘗有所命于元老院。元老院不奉詔。王曰。卿等若猶不從。朕將以一履強命卿等。元老遂唯唯不敢違。由此觀之一履。猶可以御民。故曰不必以人爲君而治之有餘也。

孟氏論專制之弊。大略如是。可謂深切著明也矣。至其論專制與立君兩體之比。則以爲專制之固。君主肆意所欲。絕無一定之法律。然行之既久。漸有相沿成習之法。以御衆。此爲政治沿革之第二期。此種政體威力與法律並行。蓋專制之稍殺者也。雖然。其法律非因民之所欲而制定。未可稱爲眞法律。只能謂之例案而已。而此例案者。果何物乎。則舊制相沿。國王之下。有若干之世臣巨室。皆有其先世所傳之規例。君主或自恣過甚。若輩輒援例以爭。藉以限制君權者。如斯而已。

孟氏又曰。立君政體國之機關。其所以運轉自如。不至破壞者。有一術焉。蓋以一種矯僞之氣習。銘刻臣僚之腦髓。牢不可破。即以人僞爲莫大之榮。是也。惟其然也。故孜孜焉。各競其職。莫敢或怠。以官階之高下。祿俸之多寡。互相夸耀。因此一念。羣臣皆自修。

飾。其甚者或致身效死。以徼身後之榮者。蓋亦有人矣。而要之不外一種矯僞之氣。驅而役之者也。

又曰。立君政體之國。苟欲不速滅亡。必其君主有好名之心。有自尊之意。以己身之光榮。與國家之光榮。視同一體。如是則必將希合民心。勉強行道。而其國亦得以小康。然君主好名之極。而世臣巨室。或不能限制其威權。則君主必自視如鬼神。而一無所顧忌。……此孟氏論立君政體之大略也。約而言之。則強暴之威力。與一定之規則。相混合而已。然則此政體者。亦專制共和兩政間之過渡時代也。

次乃論共和民主之政。孟氏以爲民政未立以前。必有一種半君半民之政。以介其間。若是者。謂之貴族政治。蓋以國中若干人。獨掌政柄。實君主之餘習也。若夫共和政治。則人人皆治人者。人人皆治于人者。蓋各以己意。選舉與議行一國之政。故曰。人人皆治人。既選定之。司法官則謹遵其令。而莫或違。故曰。人人皆治于人。而其本旨之最要者。則人民皆自定法律。自選官吏。無論立法行法。其主權皆國民自握之。而不容或喪者也。

孟氏又謂民主國所最要者。在凡百聽民自爲。其不能躬親者。則選官吏以任之。民各行其權。以選吏。其明鑒自有令人歎服者。何也。民非必皆鍊達事務。而於他人之鍊達。與否辨之最明。身經百戰者。必被舉爲武員。學問湛深者。恒被舉爲文職。餘事皆然。蓋有莫之致而至者焉。欲求國事之無失職者。莫善於此途矣。

孟氏論三種政體之元氣。其說有特精者。即專制國尙力。立君國尙名。共和國尙德。是也。而其所謂德者。非如道學家之所恒言。非如宗教家之所勸化。亦曰愛國家尙平等之公德而已。孟氏以爲專制立君等國。其國人無須乎廉潔正直。何以故。彼立君之國。以君主之威。助以法律之力。足以統攝群下而有餘。專制之國。倚刑戮之權。更可以威脅臣庶而無不足。若共和國則不然。人人據自由權。非有公德以自戒飭。而國將無以立也。

孟氏又曰。立君之國。或間有賢明之主。而臣民之有德者則甚希。試徵諸歷史。凡君主之國。其朝夕侍君側。號爲近臣者。大率皆庸惡陋劣。見之令人作嘔者也。何也。彼其坐於廟堂。衣租食稅。不營產業。其皇皇焉日夕所求。不過爵位而已。利祿而已。其氣傲其

行鄙。遇上於己者。則又卑屈無恥。遇有直言之士。則忌之特甚。聽其言。則阿諛反覆。詐偽無信。故遇仁聖之君。則惡其明察。遇庸暗之主。則貪其易欺。君主之倖臣。莫不如是。此古今東西之所同也。不甯惟是。苟在上者多行不義。而居下者守正不阿。貴族專尙詐虞。而平民獨崇廉恥。則下民將益爲官長所欺。詐所魚肉矣。故君主之國。無論上下。貴賤。一皆以變詐傾巧相遇。蓋有迫之使不得不然者也。若是君主之國。固無所用其德義。昭昭明甚也。

孟氏又嘗著波斯寓言一書。以諷當時專制政治。蓋其時歐洲惟荷蘭瑞士行民主政。頗爲各國所重。而亞洲各國。莫不畏之。故託諸波斯人語。謂荷瑞不置君主。爲歐洲最劣之國。然戶口殷息。莫踰二邦云云。篇末遂自伸己意。謂有眞光榮眞名譽眞德義者。惟民主國爲然。一國之人。可稱爲國民者。亦惟民主國爲然。其推崇民主制如是。

雖然。孟氏於民主政治之精義。尙有見之未瑩者。蓋其於法律與自由兩者之關係。及其界限。未能分明故也。孟氏謂法治之國。以法律施治
謂之法治人人得以爲其所當爲。而不能強其所不可爲。此自由權所在也。云云。顧所謂當爲者。其意甚晦。何則。政府者非能舉人

十
人。所。負。之。責。任。而。一。干。預。之。也。特。責。任。之。關。於。義。者。可。以。強。之。使。行。其。關。於。仁。者。政。府。初。不。得。而。問。也。孟。氏。又。謂。凡。法。律。之。所。聽。皆。得。爲。之。若。此。者。謂。之。自。由。云。云。雖。然。此。特。指。自。由。之。關。於。法。律。者。言。之。未。得。爲。仁。義。中。正。之。自。由。也。何。也。所。謂。法。律。者。固。非。盡。合。於。道。也。故。一。國。之。中。雖。人。人。服。從。法。律。而。未。可。謂。真。自。由。何。則。所。謂。法。律。者。誰。創。之。耶。其。法。律。果。何。如。耶。是。未。可。知。也。夫。法。律。縱。爲。美。備。若。創。法。者。爲。不。稱。其。職。之。人。而。強。行。于。國。中。是。亦。不。正。也。即。創。法。者。悉。稱。其。職。一。由。國。民。之。公。議。然。苟。有。背。於。自。由。平。等。之。理。猶。之。不。正。也。孟。氏。於。此。義。未。盡。瀏。亮。故。每。以。法。律。與。自。由。併。爲。一。譚。此。亦。千。慮。之。一。失。也。故。孟。氏。雖。推。崇。民。主。政。體。然。頗。以。不。能。持。久。爲。疑。蓋。猶。囿。於。當。時。學。者。之。所。見。以。古。代。希。臘。羅。馬。之。制。爲。民。主。政。之。極。則。而。於。法。治。之。真。精。神。尙。一。問。未。達。也。

(未完)

時局

論民族競爭之大勢

(續第三號)

中國之新民

麥堅尼。審此大勢。因風潮而利導之。其與西班牙戰也。決非欲滅西班牙而擴美國之幅員也。實欲得商業政略所不可缺之地也。故其政策能得國民多數之贊成。爲有識者所許可。及其再舉大統領時。司法院乃至下新注釋以解憲法。使其得免廢論之束縛。而自由無礙以實行帝國主義。亦可見此主義爲全國人之公言。而非一人一黨之私言矣。麥堅尼之併夏威即檀香山日本取菲律賓所以握太平洋之主權。而爲東方商力之基礎也。前此美國勢力全發揮於歐洲。固由其民族相切近。亦由大西洋爲文明之中心。雖美國東部先發達。職此之由。今則文明之中心移於太平洋。故美國之文明亦日趨於兩部。麥堅尼以爲亞細亞者。世界第一大市場也。吾美欲占一席位於此間。不可不先謀根據之地。其魯非島也。實將以馬尼刺爲美國一支店。以檳榔嶼香港新加坡而爲泰東之主人翁也。故一面併夏威以爲中站。一面開尼卡拉運河以通兩洋之

氣。脉。一。面。獎。厲。太。平。洋。航。業。設。太。平。洋。海。電。以。通。往。來。其。政。策。皆。一。貫。其。經。略。皆。偉。大。美。國。之。前。途。誰。能。限。之。

或疑麥堅尼主義與門羅主義相反對其實不然門羅主義實美人帝國主義之先河也。夫門羅主義何自起乎。一千八百二十三年。美國大統領門羅宣言曰。一歐洲列國。現在西半球所有之屬地。吾美不干預之。雖然若其地既已獨立而為美國所認者。歐洲列國或干涉之。則是對於吾美而懷敵意者也。一云云。夫美國果有何權利而為是宣言乎。無他。美國不徒以己之獨立而自足。隱然以南北兩大陸之盟主自任。以保護他人之獨立為天職。也是實帝國主義之精神也。既欲防他國之干涉。西半球勢不得不先握大西太平洋兩洋之海權。故其縣古巴。攬菲島。實皆此主義之精神。一以貫之者也。

麥堅尼最後之演說云。一吾國之生產力。其漲進實可驚。我輩不可不盡全力以求新市場。此實今日最緊切之問題也。商業之漲力。壓迫我輩。我輩非以博大之智識強毅之心力以應之。則吾國今日之勢力。將有不能維持者矣。一云云。今也。麥堅尼雖死。而

帝國主義不死屏足而立相繼而起者人人皆麥堅尼也美國之前途誰能限之。

此四國者今日世界第一等國而帝國主義之代表也自餘諸國或則懷抱帝國主義以進取為保守而尙未能達其目的也或則為他人帝國主義所侵噬而勢將不能自存也全地球八十餘國可以此三者盡之矣要之其君相宵吁於在朝其國民奔走於在野者安歸乎歸於競爭而已今日之能有此等厯大帝國也前此競爭之結果也今日之既有此等厯大帝國也又後此競爭之原因也蓋自人羣初起以來人類別為無量之小部落小部落相競進為大部落大部落相競進而為種族種族相競進而為大種族復相競焉進而為國家進而為大國家復相競焉進而為帝國進而為大帝國國家者 State 之義也帝國者 Empire 之義也其性質各不同自今以往則大帝國與大帝國競爭之時代也脫來焦氏所謂國際歷史勢將壓迫第二流以下之國家使失其獨立見第二號本論誠哉天地雖大而此後竟無可以容第二等國立足之餘地也

夫競爭之劇烈而不可止既如是矣而其競爭之場果安在乎歐羅巴者十九世紀前半期之舞臺也若神聖同盟也俄普奧三國若三角同盟也法奧意三國若俄法同盟也若拿破侖

之役也。若德意志伊大利統一之役也。若塞爾維亞門的內哥獨立之役也。若普法之役也。若波蘭問題也。若愛爾蘭問題也。若土耳其問題也。若埃及問題也。埃及在上古時代常附屬於西洋史之範圍

凡兵家所衝突。政治家所捭闔。無一不在於歐洲。近三十年來。

則全歐均勢之局定。而紅鬚碧眼兒之野心。皆飛騰於歐洲以外之天地矣。歐洲以外地非小也。然北亞美利加澳大利亞兩大陸。久已變為第二之歐洲。主權既定。且將競人而非可競於人矣。於是游刃餘地。僅有南亞美利加亞非利加亞細亞之三土。南非洲。其位置無可以為世界競爭中心點之價值。然南美之巴西。智利。委內瑞辣。亞。丁其利。權固已為德人鐵血政略所鎔鑄。非洲內地。公果立國。戴白人為君王。而德英法相軫。轉相馳逐於此土者。亦既有年。比康士非德英前相與格蘭斯頓齊名者之南非政策。且釀為英杜之爭。至今風潮未平矣。美猶如此。非猶如此。而况我亞天府之奧區者耶。亞洲競爭界之第一期。在於印度。法人在印之殖民政略。既已失敗。英人受之以雄一世。諸國嫉妒之念起焉。俄人越烏拉山。蕩進於中亞細亞。隱然有拊印背而扼印吭之勢。於是波斯阿富汗遂為英俄競爭之燒點。英人之擴權力於中國者。其初亦不過經

營印度之餘力也。鴉片戰役以前，廣東互市之事，皆東印度公司之附庸也。而法人之
 初，插足於安南暹羅，亦不外欲與印度爭利也。然而亞細亞人之主權，則已去其半矣。
 大勢所趨，愈接愈劇，及競爭之第二期，而重心點專集於中國矣。

俄人以堅忍沈鷲之性質，佐以眼明手快之政略，首看破中國之暗弱，先登捷足以逞
 侵噬。其圖中國也，凡分兩路：一曰由東北方者，滿洲一帶是也；二曰由西北方者，自西
 伯利亞以及伊犁、新疆、帕米爾、喀什噶爾一帶是也。以言乎第一項，則愛璉條約以前
 之事，且勿論。愛璉條約乃咸豐八年黑龍江將軍奕山與俄將岳福所訂者，俄人南下之勢由來已久，吾別有俄羅斯侵略史言之甚詳，此文專論近勢，無暇詞費也。當咸豐十年

英法聯軍入京之役，俄使伊格那夫詭稱調停和議，欺總署諸臣，更訂界約，以為報酬。
 割烏蘇里江、興凱湖、白稜河、瑚布圖河、瑯春河、圖們江以東之地，奄有朝鮮、日本沿海
 數千吉羅米突之廣野，其所得乃遠在英法二國之上。於是海參崴之市場，始建立焉。
 及光緒廿二年，乘日本戰事後，市還遼之恩，李鴻章遂與俄使喀希尼訂秘密條約，所
 謂中俄密約者是也。以此條約而滿洲之實權，遂全歸俄人掌握，未幾引起膠州之役。
 俄遂藉口以攫旅順口、大連灣於懷中矣。以言乎第二項，則西北一帶，自雍正五年以

來爲界約及互市章程交涉者凡十六次恰克圖爲西伯利亞往來孔道俄人設行棧於各處卡倫壟斷其利懷柔諸酋長給以兵器彈藥設電線以通本國前年且有要索恰克圖達北京鐵路權之議矣而伊犁一帶自崇厚會紀澤兩次交涉以來雖名爲回復主權而實則俄人與彼之關係切密於中國者多多矣自滿洲鐵路條約既定以後西伯利亞鐵路線其距離縮短五百四十俄里且工事加易料費大省而彼得以來二百年間苦心焦慮欲求一無冰海港而不可得遂以巴布羅福之條約光緒廿四年安坐而得亞洲第一之旅順港自此以往而俄人盡將其東歐政略即巴幹半島與土耳其交涉者暫置腦後養精蓄銳以從事於遠東既得旅順俄人遂有爲海軍國之資格于是定計自一八九三年至一八九九年七年之內備四百六十一兆零十萬羅卜俄幣名以爲海軍費九六九七兩年復增加二千六百萬九八年復增加九十萬皆羅卜數駸駸乎有於陸上海上皆以東洋主人翁自居之意矣

其次爲英國英國當中日戰役以後政略稍因循勢力幾墜於地及膠州釁起以後漸有一飛衝天之概計光緒二十三四年之間英人所得大利益於中國者凡七事其一

與總理衙門定約揚子江地方不許讓與他國其二內地江湖河川許其通航自由其三緬甸鐵路延長之以達雲南大理府復由雲南經楚雄寧遠以通四川其四開湖南爲通商口岸其五定總稅務司赫德之位置永用英人其六租借威海衛以抵抗旅順其七租借九龍以擴張香港數月之間而其權力已深入鞏固而百年大計於以定矣其前乎此者固非一朝一夕之故其後乎此者又豈得尺得寸而止耶

此外德國則專用強暴手段如膠州之役以兩教師而索百里之地義和團之變德皇誓師謂當留百年恐怖之紀念於支那是其例也美國則專用籠絡手段如列強競占勢力範圍而美國不與聞今次賠款而美人以所應得者還諸中國是其例也若法蘭西若意大利雖其帝國主義之內力不及此諸國然以世界競爭中心點之所在亦眈眈注意焉日本者世界後起之秀而東方先進之雄也近者帝國主義之聲洋溢於國中自政府之大臣政黨之論客學校之教師報館之筆員乃至新學小生市井販賈莫不口其名而艷羨之講其法而實行之試問今日茫茫大地何處有可容日本人行其帝國主義之餘地非行之於中國而誰行之近者英日同盟之事成黃白兩種人握手

以。立。於。世。界。亦。可。謂。有。史。以。來。未。有。之。佳。話。也。然。試。思。此。佳。話。之。原。因。若。何。其。結。果。若。何。豈。非。此。新。世。紀。中。民。族。競。爭。之。大。勢。全。移。於。東。方。全。移。於。東。方。之。中。國。其。潮。流。有。使。之。不。得。不。然。者。耶。而。立。於。此。舞。臺。之。中。心。者。其。自。處。當。何。如。矣。

(未完)



傳記

匈加利
愛國者
噶蘇士傳

發端

中國之新民

或問新民子曰。子著錄人物傳於叢報。而首噶蘇士何也。曰。吾欲爲前古人作傳。則吾中國古豪傑不乏焉。然前古往矣。其言論行事。感動我輩者。不如近今人之親而切也。吾欲爲近今人作傳。則歐美近世豪傑。使我傾倒者。愈不乏焉。雖然。吾儕黃人也。故吾愛黃種之豪傑。過於白種之豪傑。吾儕專制之民也。故吾法專制國之豪傑。切於自由國之豪傑。吾儕憂患之時也。故吾崇拜失意之豪傑。甚於得意之豪傑。吾乃冥求之於近世史中。有身爲黃種。而託國於白種之地。事起白種。而能爲黃種之光者。一豪傑焉。曰噶蘇士也。有起於專制之下。而爲國民伸其自由自由。雖不能伸。而亦使國民卒免於專制者。一豪傑焉。曰噶蘇士也。有所處之境。遇始于失意。中於得意。終於失意。而所懷之希望。始於得意。中於失意。終於得意者。一豪傑焉。曰噶蘇士也。噶蘇士者。實近世

一大奇人也。其位置奇。其境遇奇。其事業奇。其興之暴也奇。其敗之忽也奇。要之其理想。其氣概。其言論。行事。可以爲黃種人法。可以爲專制國之人法。可以爲失意時代之人法。孟子不云乎。奮乎百世之上。百世之下。聞者莫不興起也。而況於親炙之者乎。嗚呼。蘇士之沒。距今不過十年。吾儕去豪傑若此。其未遠也。嗚呼。讀此傳者。可以興矣。

第一節 匈加利之國體及其歷史

今世界中有所謂雙立君主國 (The Dual Monarchies) 者焉。吾中國人驟聞此語。殆不解其何謂也。雙立云者。一君主國之下。而有兩政府焉。其憲法異。其風俗異。其政府之威嚴相匹。其人民之權利相匹。語其實際。則釐然兩國也。而特同戴一君主於其上。此爲近今最新奇可喜之政體。世界中現行此種政體者。有二國。其一爲瑞典與挪威。其一則奧大利與匈加利也。此等國體。與英愛君主國有異。英皇之徽號。固稱爲大不列顛王兼愛爾蘭王。然愛爾蘭非能自有政府也。又與德普君主國有異。德國皇位。固爲普國王所承襲。德普亦各有政府。然普政府對於德政府。而有種種之權限。德政府與普政府非平等也。至奧匈等雙立國。其情實全反是。雙立國者。實一不可思議之現象。

而亦過渡時代所不得已而最適要之法門也。而奧匈兩國所以合而分、分而合、造成此等離奇政體者，其原因、經歷若何，讀噶蘇士傳可以得之。

請言匈加利之歷史。匈加利人者，亞洲黃種而古匈奴之遺裔也。西歷三百七十二年，匈奴一部落自裏海北部西侵茲土，及紀元一千年，王國之體始備。以東方之強族，浴西方之空氣，故其人堅忍不拔，崇尚自由。千二百二十二年始立憲法，有所謂金牛憲章 Golden Bull 者，實國中貴族與其王所訂定之條約也。篇中於軍役義務之制限、租稅條例之規定、司法裁判之制裁，一一明定之。且言國王若違此憲，則人民有可以執干戈以相抗之權利。蓋匈加利立國之精神，於是乎。在今世政治學者，動稱英吉利爲憲法之祖國，而此金牛憲章之成立，實在英國發布大憲章 Magna Carta 之前二年。是世界文明政體首創之者，實惟黃人。匈加利在世界史上之位置價值，亦足以豪矣。

匈加利與奧大利之關係，實自三百八十年以來。至千五百二十六年，土耳其王查理曼伐匈者六度，猙獰劫掠，殆不可當。匈王路易第二戰死，無子，其后馬利亞實奧國王，非狄能第一之妹也。以匈合奧，使並王之。自茲以往，匈遂永爲奧之屬地。然非狄能

先向國民而誓守其憲法。乃得踐位。此後百餘年間。匈人執干戈以抗暴政之權利。未或失墜。故十八世紀以前。歐洲大陸之國民。其享自由自治之幸福者。以匈加利為最。匈加利國民。義俠之國民也。前奧女王馬利亞的黎沙時代。普魯士撒遜亦德國聯邦中之一國也法蘭西諸國。聯軍破奧。女王避難於匈之坡士李尼。爾匈加利國會。求救於其民。匈人激於義憤。戰聯軍而退之。其後拿破侖蹂躪歐洲。奧大利受創最劇。奧王佛蘭西士第一。亦恃匈民義俠之力。僅乃自保。匈之有造於奧。非一端矣。及維也納會議既終。神聖同盟斯立。千八百十五年事也。當時拿破侖之風潮既息。各國君主務以鎮壓國民為事。俄普奧三帝創此會盟。誓相援助以防其民。奧人不念匈民之德。且忌而嫉之。奧相梅特涅。以絕世之奸雄。外之操縱列邦。內之壓制民氣。匈加利八百年來之民權。摧陷殆盡。水深火熱。哀鳴鳥之不聞。雨橫風狂。望潛龍之時。起時勢。造英雄。噶蘇士實此時代之產兒哉。

第二節 噶蘇士之家世及其幼年時代

千八百二年。實歐洲一最大紀念之年也。蓋世怪傑拿破侖。以是歲即位。為法蘭西王。而歐陸中心之風雲兒噶蘇士。亦以其年四月二十七日。生于匈加利北方之精布梭。

省。噶蘇士名路易。Louis Kosuth 家系雖非貴族。而其父素以愛國知名。其母熱心之新教徒也。少年受教有方。故性質高尚。熱誠過人。有非偶然者。噶蘇士早慧。年僅十六。卒業於巴特府之卡文大學校。名聲藉甚。常語人曰。丈夫志一立。何事不可成。聞者莫不歎異之。十七歲。始研究法律。奉職于某府之裁判所。以資習練。常遊歷各地。所至必參列其法廷。閱歷益深。千八百廿二年。年僅弱冠。即以法律名家聞於國中。乃歸故鄉。爲精布梭省之名譽裁判官。其天才之絕特。實有足驚者。此後十年間。從事法律之業。又往往跋涉山海。獨適曠野。或遊獵以練心膽。或演說以養雄辯。鸞鳥將擊。先修羽翮。偉人之所養。有自來矣。

第三節 噶蘇士未出以前匈國之形勢及其前輩

十九世紀之匈。加利史得三傑焉。前有沙志埃伯爵。中有噶蘇士。後有狄渥。皆國民之救主。而歷史之明星也。噶蘇士憑藉沙志埃所養成之國力。因以一鳴驚人。而其挫敗之後。未竟之業。賴狄渥以告成功。故爲噶蘇士作傳。不可不並前後二傑而論之。沙志埃伯。溫和派也。噶蘇士則急進派也。急進派之前乎噶氏者。有威哈林男爵。故欲

知噶蘇士以前匈國之形勢。則沙威兩前輩其代表也。

匈加利本有國會也。但神聖同盟以後。梅特涅正值全盛。專制政策。日進日甚。以爲外患既不足畏。所當努力者。惟防家賊而已。思及匈人毛羽未豐。從而剪之。乃七年不開國會。凡立憲君主國。召集國會之權。皆君主掌之。不甯惟是。又蹂躪金牛憲章之明文。添加軍隊。脅國民以服

兵役。增徵租賦。數倍於前。彼義俠之匈加利人。豈肯束手坐視此辜恩非禮之行哉。於是國論囂囂。鳴輿人之無狀。王不得已。乃有千八百二十五年國會之設。時乃國會上議院一豪傑出焉。則沙志埃其人也。

國會舊例。惟許用拉丁語演說。蓋奧王壓制匈人之一法門也。沙伯迸萬斛愛國之血。誠毅然脫此籍軌。當開會之日。即以匈加利語大聲疾呼。申明匈人固有之權利。歷數佛蘭西士第一之失政。海潮一鳴。聲滿天地。自此以往。十五年間。自一八二五年至一八四〇年沙伯實爲匈加利全國之代表。伯嘗作一書。以獎厲國人曰。

嗚呼我同胞。噫昔光榮赫奕之匈加利。今乃陷溺至此。吾能勿悲。雖然公等毋悲焉。奮其愛國之心。以鑄造他日光榮赫奕之新匈加利。又豈難也。

讀此數言。可以想見沙伯之爲人矣。彼不徒空言也。又實行之。凡一切開民智、增公益、之事。無不盡力。設民會以通聲氣。立高等學校以養人才。開新式劇場以厲民氣。演劇之事關於國民進化者甚大。吾別有文論之。廣郵船鐵路以便交通。興水利築海岸以阜民財。凡茲文明事業。不遑枚舉。蓋沙伯者。貴族也。實行之經世家也。其所務者。以溫和手段。易俗移風。蓄養實力。所謂老成謀國。固當如是也。

而噶蘇士者。具如電之目光。抱如燄之血誠。深有見夫民族主義爲立國之本。久懷一匈加利獨立之大理。想於其胸中。其不能以沙伯之所設施而躊躇滿志。亦勢使然也。

未幾而法國第二革命起。一八三〇年七月電流倏忽。徧傳歐洲。匈加利亦受其影響。而急進

派興。志士奔走號呼於國中。曰獨立！獨立！獨立！者所在皆是。於是乎千八百三十二年之國會。又不得不開。溫和派首領沙志埃伯。與急激派首領威哈林男。會議數

四。互相調和。乃提出協議案於國會。其略曰。

憲法者。匈加利各種法律之源泉也。不經議院之承認。而妄布法律。是與國政府之專橫者一也。千八百二十五年以來七年之間。不開國會。是政府怠慢之罪二也。

農工勞力者國民之神聖也。今殆以奴隸視之。毫無保護。是謂厲民三也。選舉權者。天賦權也。成年之民。皆當有此。而妄加制限。侵害自由。四也。國會不許用匈加利語。而惟獎厲拉丁語及日耳曼語。損匈加利之國權。五也。國文學不興。按言愛國者。本國文學最為重要。今崇拜西人者流。欲以英語為學校中獨一教科。不知本也。學校不起。窒塞民智。六也。內地工業為苛政所困。日漸衰頹。陷民死地。七也。

國會既開。連亘四年。此等諸案。日日提議。將以大行改革。拯民瘡痍。而奧王方醉夢於專制之中。視新政如蛇蝎。且恐諸案既定。而匈加利遂不可復制。於是悉予駁斥。無一

俯從。立憲君主國。議院議定之案。必經君主批准。然後施行。國會失望之餘。憤激愈甚。威哈林男慨然曰。

嗚呼。我同胞。其念之。我等所提議各件。固有利于匈民。而亦未始有害於奧人也。願奧王一一反抗之。推其意。非以我所愛之匈加利。永世為其奴隸國而不止也。奧王實匈加利之公敵也。

此之一語。激動數百萬義俠。匈國民之耳膜。且哀且痛。且憤一嘯。百吟。一呻。百問。疾入人心中。目中。口中。惟牢記金牛憲章。所謂執干戈以抗虐政之一大義。蓋舍此以外。無

餘望焉矣。與政府仇威哈林既甚。逮之下獄。思以警其餘。殊不知壓力愈緊。則躍力愈騰。百新黨演說于講壇。不如今新黨呻吟於牢檻。於是舉國中革命！革命！！革命!!!之聲。撼山岳而吞河澤矣。而其聲之最大而遠者。誰乎。則噶蘇士其人也。

第四節 議員之噶蘇士及其手寫報紙

噶蘇士之在故鄉也。聲望日隆。鋤強扶弱。恤病憐貧。闔省之人。皆感其德。願爲效死力者。蓋數千焉。一八三二年之國會。被舉爲議員。當時國會乘急激之潮流。會政府之壓虐。已成飛瀑千丈之勢。雖然。與政府頑然不顧。猶行其威權。禁各報館。凡議院中一切情形。不許登載。噶蘇士親在院中。目擊諸狀。深以國民不能備知爲憾。乃以法律家舞文之伎倆。解政府告示之語。曰政府所禁者印板也。若點石則未嘗禁也。乃將議會事情。日爲點石一紙。以布於國民。國民如旱望霓。如渴得飲。展轉傳誦。不脛而徧國中。與政府覩此情形。急下令曰。點石亦印刷物也。宜一併禁之。噶蘇士之熱心。既以壓抑而益增。國民望噶氏之報告。亦隨艱難而愈切。彼乃廣聘鈔胥。將其所草議院日記。加以論評。手寫之以應求者。且復於政府曰。是書簡非報章也。政府無論若何橫暴。豈有權

禁。我。不。發。一。信。耶。政。府。無。如。之。何。於。是。噶。家。墨。蹟。報。遂。風。靡。全。何。每。次。發。行。至。一。萬。分。以。上。眇。然。僻。壤。一。書。生。遂。一。躍。而。爲。全。歐。奸。雄。梅。特。涅。之。大。敵。矣。

當。此。之。時。噶。蘇。士。之。強。毅。刻。苦。有。使。人。驚。絕。者。拿。破。侖。一。晝。夜。睡。四。小。時。舉。世。傳。爲。佳。話。而。噶。蘇。士。此。際。每。晝。夜。僅。睡。三。小。時。耳。嗚。呼。偉。人。乎。偉。人。乎。豈。徒。其。心。力。強。其。腦。力。強。蓋。其。體。魄。亦。必。有。大。過。人。者。有。志。天。下。事。者。亦。可。以。知。所。養。矣。

奧。政。府。視。噶。氏。爲。眼。釘。爲。喉。嚥。也。久。矣。顧。重。犯。衆。怒。未。敢。逕。與。爲。仇。以。爲。議。院。期。滿。解。閉。之。後。而。其。鈔。報。亦。當。停。止。也。姑。少。俟。之。乃。噶。蘇。士。於。閉。會。之。後。復。移。其。報。館。於。彼。斯。得。省。而。廣。記。省。議。會。府。議。會。之。事。其。然。濫。犀。鑄。禹。鼎。之。筆。舌。仍。旋。盪。而。不。停。其。呼。風。雨。泣。鬼。神。之。文。章。且。光。芒。而。益。上。政。府。既。已。處。騎。虎。難。下。之。勢。而。彼。亦。自。知。奇。禍。之。不。遠。矣。日。者。偶。携。一。友。散。步。於。布。打。城。外。之。野。指。牢。獄。之。石。垣。而。言。曰。

吾。不。久。將。爲。此。中。之。人。雖。然。我。同。胞。若。由。我。而。得。自。由。吾。雖。爲。此。中。之。鬼。所。不。辭。也。時。急。進。黨。既。失。威。哈。林。男。噶。蘇。士。遂。有。爲。全。黨。首。領。之。觀。其。慨。然。犧。牲。一。身。以。供。國。家。蓋。十。年。以。來。之。素。志。自。審。既。熟。矣。鼎。鑊。甘。如。飴。求。之。不。可。得。男。兒。男。兒。不。當。如。是。耶。

果也奇禍之至。如彼所期。奧政府遂以一八三七年五月四日。逮此大逆不道者。繫之於布打城之獄。此後龍跳虎擲之噶蘇士。失其自由者蓋三年。時三十七歲也

第五節 獄中之噶蘇士

塞翁失馬。安知非福。此中國之恒言也。噶蘇士之下獄。其所志一挫。雖然。此三年中。內之修養其精神。而進德愈加勇猛。外之蓄積其聲望。而國民益繫懷思。蓋爲其將來大飛躍之地步者不少焉。試觀其獄中筆記內一節云。

獄中之第一年。一書不許讀。一字不許書。誠無聊極也。第二年。始許讀書。然政治時務之書。尙一切禁之。吾之嗜政治時務書固也。雖然。既已不得。則亦不可辜負此許讀書之權利。反覆思維。莫如先學英文。乃向獄吏乞得英文典、英匈字典、及索士比亞之詩文集。各一部讀之。既無教師。惟憑自悟。乃依文典以讀索集。每讀一葉。必求全通其意。毫無疑義。乃及他集。蓋讀第一葉費兩禮拜云。此後凡二年間。專從事於英文學。盡解其趣味。而精神之修養亦大增。

索士比亞 *Shakspeare*。集者。英文學之精髓。英人所稱爲通俗之聖經者也。索氏爲英國第一詩人。

讀英書者。噶蘇士既通英文以增其學識。復養人格以高其品性。獄吏之有造於噶氏者。不亦大耶。加以其被逮之時。彼所播文明種子。既已徧于國中。聞者固莫不扼腕流涕矣。而當其對簿法廷。激昂慷慨。自辯無罪。而叱政府之非禮。其言論風采。長印于全國人之腦中。故此三年間。其身。在黑暗之中。而其聲名。如旭日。昇天。隆隆。愈上。國民無一日。而或忘也。自都會游說之士。以及山谷扶杖之民。輒引領攘臂曰。救噶蘇士！救噶蘇士！所在皆然矣。

噶蘇士投獄之翌年。奧政府因埃及土耳其事件。不得不增軍備。欲募兵一萬八千於匈加利。奧王乃復開國會。具案以請於匈人。匈人疾王之反覆無常也。無事之時。則蹂躪我權利。繫捕我恩人。一旦有事。輒欲借我兵力。是烏乎可。乃於國會未開以前。先開一大會。採國民之意向。選委員以與政府交涉。略謂政府若能廢虐政。而釋威哈林噶蘇士。則匈民惟政府所命。而匈之濫和黨。又別具案以忠告政府曰。匈加利之國情。一如委員所述。政府非讓步。則欲事之成難矣。惟赦免噶蘇士一事。則不可從。噶蘇士。猛虎也。一日出山。其氣將不可當云云。觀此亦可知噶氏人物之價值何如矣。奧政府之

接此兩案也。躊躇未決。而國會之期已至。討論六月。異議百出。而政府所希望之目的。卒不可得達。宰相梅特涅。苦思焦慮。知非釋免噶蘇士等。而所事終不得就。於是出獄之命遂下。

千八百四十年五月十六日。是匈加利國民迎其恩人於布打獄城之一大紀念日也。萬衆簇擁之中。獄門開。處見彼日炯炯神奕奕之噶蘇士。以右手携一白髮之瞽者。徐步而出。歡呼之聲。忽震山岳。噫。此瞽爲誰。即當年在國會掀髯豎髮。聲淚俱下。直斥奧王佛蘭西士爲匈加利公敵之威哈林男爵也。從噶蘇士之後者。有狂夫一。有瀕於死者三。皆急進黨中之錚錚者。曾叱咤風雲。爲國前驅者也。義俠之匈加利民。搵一掬之淚。以迎其愛國者于萬死一生之中。嗚呼。其感慨何如哉。

〔未完〕

子房未虎嘯

破產不為家

信海得壯也

維秦博浪沙

報韓雖不成

天下皆驚動

潛匿游下邳

登日非智勇

古

亞洲地理大勢論

中國之新民

本文以日本志賀重昂氏地理學講義中『亞細亞地理考究之方針』一篇為藍本。而略加己意。志賀氏原著。魯鄰書局嘗有譯本。今不避駢枝之譏者。取北本涅槃經與南本合讀。然後知謝靈運再治之功。非得已也。譯者識。原書無西文今特補入以備考譯者附識

大哉亞細亞。問其面積。則占全世界陸地三分之一也。問其人口。則居全世界生靈一半。有奇也。以地勢論。則其在陸土者。有全世界第一之高山。喜馬拉山脈第一之高原。西藏第一之平原。西伯利亞第一之湖水。裏海第一之灌域。土耳其斯坦之低原第一之低地。敘利亞國之佐但溪谷其有全世界第一之水面。太平洋全世界第一之深淵。日本國千島西三百五十里之處深四千五百尋世界第一之深海也以地氣論。則包羅寒帶溫帶熱帶。凡極寒極熱極乾極溼之氣候。無所不有。凡極風變風貿易風恒風颶風之區域。無所不備。以人類論。則有黃人白人馬來人之各種。世界三大言語系統。皆由此起焉。以生物論。則如象如虎如獅如犀。物類之最龐大而猛烈者。皆於

此。生。焉。語。其。歷。史。則。距。今。二。十。五。萬。年。前。世。界。最。初。之。人。類。實。發。育。於。其。大。陸。之。中。部。

爾。來。絕。代。之。偉。人。如。釋。迦。如。孔。子。如。耶。穌。如。摩。訶。末。波斯之教主生於西歷紀元前千四百年頃

如。佛。教。如。儒。教。如。天。教。即回教教主或譯為摩哈默德唐書曾譯此三字今從之 相。接。出。現。於。此。土。全。世。界。所。有。之。宗。教。如。婆。羅。門。教。

如。基。督。教。如。回。教。如。馬。尼。教。即摩阿士打之教也名見唐書 Manichaeism 亦波斯教之一種也

等。無。一。非。此。土。之。產。物。也。號。稱。世。界。最。古。之。國。如。印。度。如。中。華。如。猶。太。如。叙。利。亞。

無。一。非。此。土。之。肇。建。也。而。泰。西。一。切。文。學。哲。學。美。術。巧。藝。其。淵。源。大。率。自。印。度。中。華。

叙。利。亞。巴。比。倫。尼。亞。腓。尼。西。亞。Phoenicia 波。斯。阿。刺。伯。等。國。而。來。無。一。非。此。

土。之。子。孫。也。又。豈。惟。古。代。而。已。即。洎。近。世。而。亞。細。亞。人。實。兩。度。根。據。此。大。陸。以。造。全。世。

界。第。一。大。帝。國。則。成。吉。思。汗。帖。木。兒。其。人。也。大。哉。亞。細。亞。大。哉。亞。細。亞。自。地。勢。上。觀。之。

自。歷。史。上。觀。之。彼。歐。羅。巴。亞。非。利。加。之。二。洲。實。不。過。亞。細。亞。之。一。附。庸。耳。昔。瑟。約。博。士

嘗。講。述。歐。洲。之。風。土。以。謂。歐。洲。發。達。之。原。因。全。由。於。其。地。勢。之。『Permeability』易透達之義 而

因。以。頌。揚。歐。陸。構。造。之。佳。妙。沾。沾。自。喜。焉。殊。不。知。凡。物。之。易。於。透。達。者。適。足。以。見。其。物。

體。之。小。而。已。質。而。言。之。則。歐。洲。之。結。構。也。規。模。淺。小。尋。常。人。類。易。擎。舉。而。易。指。揮。之。此

其所以速進文明之原因也。亞洲則不然。其規模絕大。其器量深宏。淵淵浩浩。而不可測焉。亞洲之所以爲亞洲者。不在現在。而在未來也。

今請就歐洲小而易用之理。一一指明之。以相互證。則亞洲之前途。有可懸度者。歐洲

文明之初開也。由希臘。何故必由希臘。希臘之地形。半島也。三面環海。一面連陸者謂之半島。而此半島

中更爲小半島焉。此小半島中。又更爲小半島焉。故其地形最適於利用。語其地勢。則

山脉縱橫。溪谷川原。所在皆是。泉甘土肥。而於人類結構小羣。最爲利便。加以海岸出

入屈曲。有島嶼。有港灣。有峽角。故其海之適于利用也。亦甚。此其開化之所以獨早。非

偶然也。希臘之文明。潛移默轉。而入於羅馬。羅馬之在意大利。亦半島也。北界亞臘士

Alps 山脉。蜿蜒南趨。突入地中海。與阿得里亞的海 Adriatic 爲細長之陸地。其規模

視希臘半島稍大。而其適於人類之利用一也。希臘云亡。而歐土之文明。銷沈者。歷有

年所。及中世之末。元氣回復。其捷足飛揚者。則西班牙及葡萄牙也。西葡亦半島也。

(西葡兩國之地。總名伊比利半島 Iberian Peninsula) 其海陸規模亦淺小。所以克爲近世之先進

國也。希臘最小。故開化最先。羅馬次小。則次之。伊比利次小。則又次之。三半島興發之

次第。其別因難或尙多。然由於地形大小之比例。殆其重要者也。南歐之文物。既已伐謝。其舞臺漸移於北。於是人類難使用之地。日以進發。即其勢自最易者。以趨於稍易者。自稍易者。以趨於稍難者。自稍難者。以趨於更難者。其塗徑歷歷。可覆按也。近數百年來。遂經法蘭西。英吉利。德意志。而入於斯拉夫民族根據地之俄羅斯。歐洲識者。謂未來之大希望。大結果。將在俄人。非無故也。白人之國。角立於歐洲之東西。土壤有限。人滿爲憂。相競利用。此規模淺小之歐羅巴。精華將竭。各爭寸土。以至演出狼吞虎噬。弱肉強食之活劇。上天好生之德。不忍視歐人之慘狀也。乃於其中誕降一豪傑焉。曰哥倫布。使爲其同胞。揭開久蔽之幕。幕既開。而所謂「新世界」者。突兀躍出於人間。即亞美利加是也。天之製造此新舞臺也。用全力注全神。故其地形之結構。斐然可觀。其規模絕大。不如歐陸之淺小。而北亞美利加。尤爲美妙。其東其西。皆環以大瀛。恐其內陸氣候之乾燥也。乃鑿廣而深之淡水湖。五以湛潤之。溶全世界第一之大河。以灌漑之。其天然界之美滿。毫無遺憾矣。南美之結構。雖稍亞於北。然亦有大可歎美者。新世界之規模。雖絕大。其適於利用之點。亦多。此白人所以能造第二之歐羅巴於此間。

也。上天以爲此新世界者其面積如此其廣大其形勢如此其完美雖無量數之生靈自舊世界飛渡屬集當綽綽然容之有餘裕乃開闢而招之曰嘻盍歸乎來歐人受此奇寵劍及履及嗚呼一聲突進闖入拓草萊任土地建邦國僅數百載而人滿又見告矣。噫昔以農產國名者一變而爲製造國噫昔以共和主義著者一變而爲帝國主義歐人昔以爲殖民政略之劇場者轉瞬之間卻自行其殖民政略于太平洋以外矣上天既以此厯大之土賜其驕子謂此後可以暫安息乎沈沈而醉者三百年及起而曉之則已成爲第二之舊世界其慘狀視前更劇矣天亦無如此驕子何也乃於咄嗟之間築造澳大利亞洲忽開其幕而以此最新之舞臺並畀諸歐人此澳洲者其地形如一初製之模海岸之屈曲出入殊少其山不高其河不長無水無湖不能調和內陸之氣候其動物也惟有襁兒於腹之袋鼠不飛不鳴之鴛鳥蓋其製造成於急就而百物不完備之一土也歐人既得澳大利亞也先利用其可以利用之部分不數十年而此「最新世界」又成爲第三之歐羅巴矣。於是其動機不得不轉而向於亞非利加非洲與歐洲相隔一葦水其西北殆接歐境雖然其地形大而無當海岸皆缺交通之利加以

萬里不毛之沙漠。橫亘其中央。炎熱瘴癘。而利用極難。此所以雖相近而用之極遲也。今也新世界之阿美利加。既無餘地矣。最新世界之澳大利亞。復無餘地矣。然則此視。眈眈欲逐逐之歐人。豈能叉手安坐以終古。故近年以來。瓜分非洲之勢。如餓如潮。不轉瞬間。鬻割以盡。今者撒哈拉中一粒之沙。皆有主人翁矣。撒哈拉大沙漠今屬法蘭西勢力範圍亞非利加之為第四歐羅巴。其期又將不遠矣。嗟夫。嗟夫。螟蛉有子。果羸負之。茫茫四大壤。竟全為歐羅巴之附庸之奴隸。李義山詩云。自是當時天帝醉。不關秦地有山河。展覽坤圖。不禁且歎且妒。而且悚皇也。

渾圖球上六大洲中。其五已入歐人之懷。所餘者惟亞細亞而已。雖然。亞細亞之現勢

及前途。則又如何。試觀其地圖。表中所列者日本里也。今勿卒未暇改正之。讀者但以一里當中國七里之比例求之可也。

面積

人口

亞細亞洲	二、八八〇、〇〇〇方里	八三五、〇〇〇、〇〇〇人
俄羅斯屬	一、一〇〇、〇〇〇方里	一、二〇、〇〇〇、〇〇〇人
英吉利屬	三三三〇、〇〇〇方里	三〇〇、〇〇〇、〇〇〇人

法蘭西屬

四四、七〇〇方里

一三二、〇〇〇、〇〇〇人

葡萄牙屬

一、三〇〇方里

一、〇〇〇、〇〇〇人

總計

一、四七六、〇〇〇方里

三四三、〇〇〇、〇〇〇人

由此觀之。則亞細亞洲面積十分之五有奇。人口十分之四有奇。既已落歐人掌握中矣。即自其中部以至北部全體之一大地。俄羅斯人所有也。森森裏海。將為俄人之湖也。其南部之中央一絕大之半島曰印度。英吉利人所有也。印度西鄰之阿富汗斯坦俾路芝斯坦。非英人之保護國。則其勢力範圍也。又法蘭西人自距今四十年前。漸染指于後印度半島。同治元年。奪交趾。二年滅柬埔寨。光緒三年。經略東京。滅安南。為其保護國。十九年。敗暹羅。割其地三之一。於是而亞細亞之法蘭西小帝國立焉。法人之滅安南也。儼然以中國南部將來之主人翁自命。若英國者。豈能袖手旁觀哉。故於光緒三年。勃起而征緬甸。俘其王。吞其地。於是。以印度為本體。而阿富汗俾路芝為其右臂。緬甸為其左臂。以取威定霸於大陸南部之中央。嗚呼。泱泱大風之亞細亞。今已強半夷為歐隸所餘。號稱獨立國者。惟波斯暹羅朝鮮日本中國之五者而已。又豈惟亞


細亞實則渾圓球上除歐種以外所餘獨立國者惟此五者而已。雖然波斯何所恃而能獨立於今日乎？波斯之北有俄。中亞細亞及其南有英。阿富汗俾均之間僅得自保。俄人得烟草專賣權。英人則得鐵路布設權。兩雄相持暫延殘喘。苟兩勢一旦不均則其滅亡可翹足而待矣。暹羅何所恃而能獨立於今日乎？暹羅之西有英。緬甸其東有法。東埔寨介於英法勢力兩兩平均之間僅得自保。苟兩勢一旦不均則其滅亡可翹足而待矣。朝鮮何所恃而能獨立於今日乎？朝鮮之東有日本。其北有俄。其南有英。介于俄英日勢力三者平均之間僅得自保。苟三勢一旦不均則其滅亡可翹足而待矣。日本固今世之雄也。其獨立頗由自力。今且與歐洲第一雄國新聯盟焉。其意氣揚揚自得之概。今勿具論。若我中華則豈非亞細亞大陸之中心點而數千年來之主人哉。顧今則何如。葡萄牙自明嘉靖十六年。一五三七年割據南部之澳門。俄羅新自咸豐八年。一八五八年破尼布楚之約。康熙廿八年即一六八九年中俄所定界約以外興安嶺為境者也而別立愛璉條約。遂駭駭南下以占黑龍江一帶之地。及十年。一八六〇年更以詭術結北京條約。遂超黑龍江而南。併吞滿洲東海岸二千七百里之地。以開浦鹽斯德港。即海參崴英吉利以道光二十八年

鴉片之役。割香港。光緒二十三年。更割九龍。若夫丁酉戊戌之間。列國互逞鯨吞蠶食之謀。德據山東南海岸之膠州灣。英據其北海岸之威海衛。俄占遼東半島之旅順口。大連灣。法占南部之廣州灣及桂越間甌脫地。而各國勢力範圍之議。且日進而未有已焉。危乎微哉。中國之爲獨立國乎。而此獨立國。若一日不支。則此搏搏渾球。竟爲白種一家之私產矣。夫亞細亞者。宏深而難測。偉大而難用者也。而他日有用之之資格者。其爲習居此土而有經驗之中國人乎。其爲慣用他地而有經驗之歐洲人乎。嗚呼。上帝臨汝。無貳爾心。先之以告。誠繼之以警懼。天或者其深有望於中國人種而示以履霜堅冰之漸。教以前車覆轍之鑒也。嗚呼。亞細亞之興亡。在於今日。吾記述至此。不禁旁皇繞室。而起舞再三也。

亞細亞之規模。既絕大而不可測。故欲講其山河之形勢。氣候之程度。生物之分布。人情風俗宗教之起源。成立。其事固非易易。即勉強記憶。亦不移時而遺忘焉。今以簡要之法。叙述其大體如下。

第一。欲知亞洲之地勢山河之形狀。則可爲一略圖。如甲乙丙丁。而甲乙線爲北冰洋

之太平洋。庚庚(戊)以南之川河。必流注於丙丁線之印度洋。勢所必然矣。然後取地圖




第 一 圖

瀕海之記號。甲丙線為太平洋瀕海之記號。丙丁線為印度洋瀕海之記號。乙丁線為毗連大陸歐羅巴洲之記號。再記其山脉。以(戊)戊為汗都喬柱 Hindu-Kush 及崑崙山脉之記號。以(己)己為阿爾泰山脉之記號。以(庚)庚為喜馬拉耶 *Himalaya* 山 即雪 山脉之記號。但觀此。則亞洲中央之地勢甚高。崇自可想見矣。而全洲水河之源。必由此高地而起。亦可想見矣。明此形勢。則可以悟(戊)(己)己以北之川河。必流注於甲乙線之北冰洋。(己)己庚庚間之川河。必流注於甲乙線

以對照參觀之。則知里拿 Lena 河、伊尼西 Yenisei 河、阿比 Obi 河等之北流。黑龍江、黃河、揚子江等之東流。湄伽 Ganges 河、即恒河印度河等之南流。皆有非偶然者。熟察諸大河系之流域。則可悟亞細亞大陸實以三大平原一大高原而成。三大平原者。一圖中之子。即己。戊以北一帶。西伯利亞平原是也。二圖中之丑。即己。庚以東一帶。支那平原是也。三圖中之寅。即庚。庚。戊以南一帶。印度平原是也。一大高原者。圖中之卯。即戊以西一帶。伊蘭 Iran 高原是也。即波斯及突厥亞屬之一部於是乎全洲之地勢。山河之大體。可以一目了然矣。復次言其氣候。則子。西伯利亞部。寒冷也。丑。支那部。溫暖也。寅。印度部。炎熱也。卯。伊蘭部。寒熱皆達於極端也。於是乎各部動植物之差異。及各部之物產。與其人民職業之差異。亦可以推定。

次考亞細亞洲之人種。則(一)西伯利亞部。劣等黃人種居之。(二)支那部。高等黃人種居之。(三)印度部。高加索人種居之。(四)伊蘭部。黃人種與高加索人種雜居之。其人種之分布。亦與其地勢之區別。悉相比附。有如此者。

次考亞細亞洲人民之宗教。則(一)西伯利亞部人民。所奉者沙瑪尼教也。其附近支那之部分。或奉佛



第 二 圖

教。其附近俄國之部。或奉希臘教。分。或奉希臘教。本報第二冊曾詳言之。吾國人所有迷信思想。皆受佛教之影響者也。

(二) 支那部人民。兼中國、蒙古、西藏、朝鮮、日本、安南、暹羅、緬甸、諸國而言。所奉者佛教也。我孔子非宗教家。

(三) 印度部之人民。兼中亞細亞諸國。如阿富汗斯坦、俾路芝斯、坦、波斯、亞刺伯、及亞屬突厥諸國民言之。所奉者回教也。其所以生此區別者。亦非偶然。

(四) 伊蘭部之人民。兼中亞細亞諸國。如阿富汗斯坦、俾路芝斯、坦、波斯、亞刺伯、及亞屬突厥諸國民言之。所奉者回教也。其所以生此區別者。亦非偶然。

又。以各部之地勢、氣候、生物、民業、人種、宗教、之差別。對照比較。則可知其各部特別開化之由。

(一) 西伯利亞之劣等文明也。

(二) 支那之文明即起于支那。擴布於蒙古、西藏、朝鮮、日本、安南、暹羅、緬甸、諸國者也。


(三) 印度之文明即桑士格列之文明也。

(四) 波斯、亞刺伯、即伊、蘭、部、之、文、明、即、回、教、的、文、明、也、其、所、以、發、生、之、由、亦、皆、可、以、地、理、之、勢、測、定、之、矣。

用此方法。不徒可以考一洲之地理而已。即講各國之地理。亦當如是也。試以印度之地理為例。先畫定印度之形狀。為甲乙丙丁記號。如第二圖。丙丁線則瀕于邊卡灣 Beg of Bengal 者也。乙丁線則瀕于亞刺伯海者也。其所有諸山

脉。則如圖中所示喜馬拉耶山、汗都喬柱山、溫的耶 Vindhya 山、西噶士 Ghats 山、東噶士山之位置。由是其國內諸河。如印度河、蹋梯 Taptee 河、噶達維里 Godavari 河、殽伽河等之水源灌域。及其所流注之尾閭。皆可以悟出。又可見印度之國。由兩大平原結搆而成。第一如圖(子)殽伽河之溪谷也。第二如圖(丑)噶達維里山與噶士山之間也。用此符號記之。則開卷瞭如矣。

學者苟能用此法則以觀各部地理。而按地圖以考証之。則若網在綱。有條不紊。泱泱全洲之形勢。可頃刻而盡納入於腦中矣。治學當得其門徑。此之謂也。



論中國學術思想變遷之大勢

中國之新民

第三章 全盛時代

第一節 論周末學術思想勃興之原因

全盛時代。以戰國為主。而發端實在春秋之末。孔北老南。對壘互峙。九流十家。繼軌並作。如春雷一聲。萬綠齊茁於廣野。如火山乍裂。熱石競飛於天外。壯哉盛哉。非特中華學界之大觀。抑亦世界學史之偉蹟也。求其所以致此之原因。蓋七事焉。

一由蘊蓄之宏富也。人羣初起。皆自草昧而進於光華。文明者。非一手一足所能

成。非一朝一夕所可幾也。傳記所載。黃帝堯舜以來。文化已起。然史公猶謂摺紳難言

焉。觀夏殷時代質朴之風。猶且若此。則唐虞以前之文明。概可想矣。凡人羣進化之公例。必由行國進而為居國。

由漁獵進而為畜牧。由畜牧進而為耕桑。殷自成湯以至盤庚。凡五遷其都。蓋尙未能脫行國之風焉。孟子頌周公之功。則曰兼夷狄驅猛獸。詩美宣王之德。則以牛羊蕃息。蓋殷周以前尙未盡成居國成農國也。

及文王化被南國。武周繼起。而中央集權之制大定。威儀三千。周官三百。護學家言。禮儀周禮也。威儀

也。孔子歎之曰。周監於二代。郁郁乎文哉。吾從周。自幽岐以至春秋。又數百年。休養生息。遂一脫蠻野固陋之態。觀於左傳。列國士大夫之多才藝。爛文學者。所在皆然矣。積數千年。民族之腦精。遞相遺傳。遞相擴充。其機固有磅礴鬱積一觸即發之勢。而其所承受大陸之氣象。與兩河流之精華。機會已熟。則沛然矣。此固非島夷谷民崎嶇偏仄者之所能望也。此其一。

一由於社會之變遷也。由堯舜至於周初。由周初至於東遷。由東遷至於春秋之末。

其間固劃然分爲數時代。其變遷之跡。亦有不可掩者。雖然。其跡不甚著。而史傳亦不詳。

焉。獨至獲麟以後。迄於秦始。實爲中國社會變動最劇之時代。上自國土政治下及人。

心風俗皆與前此截然劃一鴻溝。顧亭林日知錄云。自左傳之終以至戰國。凡百三十二年。史又闕。考古者爲之茫昧。如春秋時猶尊禮重信。而七國則絕不

言禮與信矣。春秋時猶宗周王。而七國則絕不言王矣。春秋時猶嚴祭祀重聘享。而七國則無其事矣。春秋時猶論宗姓氏族。七國則無一言及矣。春秋時猶宴會賦詩。而七國則不聞矣。春秋時猶有赴告策幣。

而七國則無有矣。邦無定交。士無定主。此皆變於一百三十二年之間。史而其變動之影響一一皆

之闕文。而後人可以意推者也。不待始皇并天下。而文武之道已盡矣。波及於學術思想界。蓋閥閱之階級一破。前此爲貴族世官所壟斷之學問。一舉而散。

諸民間。遂有秦失其鹿。天下共逐之觀。歐洲十四五世紀時。學權由教會散諸民間。情形正與此同。此近世文明所由開也。周室之勢。

既微其所餘。虛文儀式之陳言。不足以範圍一世之人心。遂有河出伏流。一瀉千里之概。此其二。

一由於思想言論之自由也。凡思想之分合。常與政治之分合成比例。國土隸於一王。則教學亦定於一尊。勢使然也。周室為中央一統之祖。當其盛也。威權無外。禮記玉制所載。作左道以惑眾。殺作奇器。異服奇技淫巧。以疑眾。殺行偽而堅言。偽而辨學。非而博順。非而澤以疑眾。殺蓋思想言論之束縛甚矣。周既不綱。權力四散。游士學者各稱道其所自得。以橫行於天下。不容於一國。則去而之他而已。故仲尼好七十二君。墨翟來往大江南北。荀卿所謂「無置錐之地。而王公不能與之爭名。在一大夫之位。則一君不能獨畜。一國不能獨容。」言論之自由至是而極。加以歷古以來無宗教臭味。先進學說未深入人心。學者盡其力之所及。拓殖新土。無望無礙。豈所謂海闊從魚躍。天空任鳥飛者耶。莊子曰。天下大亂。賢聖不明。道德不一。學者多得一察焉。以自好。天下孟子曰。聖王不作。諸侯放恣。處士橫議。蓋政權之聚散。影響於學術思想者如是其甚也。此其三。

一由於交通之頻繁也。泰西文明發生有三階段。其在上古則腓尼西亞以商業之故常周航於地中海之東西南岸。運安息埃及之文明以入歐羅也。其在中世則十字軍東征。亘二百年。阿刺伯人西漸。威懾歐陸。由直接間接種種機會。以輸入巴比倫猶太之舊文明。與隋唐時代之新文明也。其在近世則列國並立。會盟征伐。常若比鄰。彼此觀感相摩而善也。由此觀之。安有不藉交通之力者乎。交通之道不一。或以國際各國交涉。日本名為國際。取孟子交際何心之義。最為精善。今從之。或以力征。或以服賈。或以游歷。要之。其有益於文明一也。春秋戰國之時。兼并盛行。互相侵伐。其軍隊所及。自濡染其國政教風俗之一二。歸而調和於其本邦。征伐愈多。則調和愈多。而一種新思想。自不得不生。其在平時。則聘享交際之道。常為國家休戚所關。當時羣雄割據。大國欲籠絡小國。以自雄。小國則承事大國。以求保護。故其交際皆甚重要。非如周初朝覲貢獻方物。循行故事而已。故各國皆不得不妙選人才。以相往來。若相鼠茅鷄之不知將辱國體而危亡隨之矣。其膺交通之任者。既國中文學最優之士。及其游於他社會。自能吸取其精英。齎之歸。以為用。如韓宣子聘魯。而見易象。春秋吳季札聘上國。而知十五國風。皆其例也。而當時通商之業亦漸盛。豪商巨賈。往往與士大夫相酬酢。如鄭商弦高。能以身救國。子貢

廢著鬻財於曹魯之間。結駟連騎以聘享諸侯。所至國君無不分庭與之。抗禮而陽。大賈呂不韋至能召集門客。著呂氏春秋。蓋商業之盛。通爲學術思想之媒介者。亦不少焉。若夫縱橫捭闔之士。專以奔走游說爲業者。又不待言矣。故數千年來。交通之道。莫盛于戰國。此其四。

一由於人材之見重也。一統獨立之國務。綏靖內憂。馴擾魁桀。不羈之氣。故利民之愚。並立爭競之國務。防禦外侮。動需奇材。異能之徒。故利民之智。此亦古今中外得失之林哉。衰周之際。兼并最烈。時君之求人才。載飢載渴。又不徒獎勵本國之才而已。且專吸他國者而利用之。蓋得之則可以爲雄。失之且恐其走胡走越。以爲吾患也。故秦迎孟嘗而齊王速復其位。商鞅去國而魏遂弱於秦。游士之聲價重於時矣。貴族階級摧蕩廓清。布衣卿相之局遂起。貴族階級最爲文明之障礙。中國破此界最早。是亦歷史之光也。士之欲得志於時者。莫不研精學問。標新領異。以自取重。雖其中多有勢利無恥者。固不待言。而學問以辨而明。思潮以摩而起。道術之言遂徧於天下。此其五。

一由於文字之趨簡也。中國文字衍形不衍音。故進化之難。原因於此者不少。但新

形之中。亦多變異。而改易最劇者。惟周末爲甚。倉頡以來所用古籀。象形之文。十而八九。近世學者。搜羅商周鐘鼎。其字體。蓋大略相類。至秦皇刻石。而大變焉矣。說文序云。『諸侯力政。分爲七國。言語異聲。文字異形。秦始皇帝初兼天下。丞相李斯。乃奏聞之。罷其不與秦文合者。』然則當時各國各因所宜。隨言造文。轉變非一。故今傳墨子楚辭所用字。往往與北方中原之書。互有出入。漢書藝文志謂『秦始造隸書。起於官獄多事。苟趨省易。』其實日趨簡易者。人羣進化之公例。積之者已非一日。而必非秦所能驟創也。文字既簡。則書籍漸盛。墨子載書五車。以游諸侯。莊子亦言惠施多方。其書五車。學者之研究日易。而發達亦因之以速。勢使然也。此其六。

一由於講學之風盛也。前此學術。既在世官。則非其族者。不敢希望及學。風興於下。則不徒其發生也。驟而其傳播也。亦速。凡創一學說者。輒廣求徒侶。傳與其人。而千里負笈者。亦不絕於道。孔子之弟子三千。墨子之鉅子。徧於宋鄭齊之間。孟子後車數十乘。從者數百人。許行之徒數十人。捆屨織席。以爲食。蓋百家莫不皆然矣。此實定哀以前之所無也。故一主義於此。一人倡之。百人從而和之。一人啓其端。而百人揚其華。安

得而不昌明也。此其七。

此七端者。能盡其原因與否。吾不敢言。要之略具於是矣。全盛時代之所以為全盛。豈偶然哉。豈偶然哉。

第二節 論諸家之派別

先秦之學。既稱極盛。則其派別自千條萬緒。非易論定。今請先述古籍分類異同之說。而別以鄙見損益之。

古籍中記載最詳者。為漢書藝文志。其所本者劉歆七略也。篇中諸子略。實為學派論之中心點。而兵書略術數略方技略。亦學術界一部之現象也。今舉諸子略之目如下。

凡為十家。亦稱九流。小說家不在九流之內。

- 一 儒家
- 二 道家
- 三 陰陽家
- 四 法家
- 五 名家
- 六 墨家
- 七 從橫家
- 八 雜家
- 九 農家
- 十 小說家

又史記太史公自序。述其父司馬談論六家要指。凡六家。

- 一 陰陽家
- 二 儒家
- 三 墨家
- 四 名家
- 五 法家
- 六 道德家

諸子書中論學派者。以荀子之非十二子篇。莊子之天下篇。為最詳。荀子所論。凡六說。十二家。

- 一 它 鷲 魏 牟
- 二 陳 仲 史 緇
- 三 墨 翟 宋 鉞
- 四 慎 到 田 駢
- 五 惠 施 鄧 析
- 六 子 思 孟 軻

莊子所論凡五家。並已而六。

- 一 墨 翟 禽 滑 釐
- 二 宋 鉞 尹 文
- 三 彭 蒙 田 駢 慎 到
- 四 關 尹 老 聃
- 五 莊 周
- 六 惠 施


以上四篇。皆專論學派者也。其他各書。論及者亦不尠。孟子則以楊墨並舉。又以儒墨。楊並舉。韓非子顯學篇。則以儒墨並舉。又以儒墨楊乘並舉。史記則以老子韓非合傳。而孟子荀卿傳中。附論騶忌。騶衍。淳于髡。慎到。環淵。接子。田駢。騶奭。公孫龍。劇子。李悝。尸子。長盧。吁子。以及墨翟焉。

四篇之論。荀子最為雜亂。荀子北派之鉅子也。故所列十二家。皆北人。而南人無一焉。以老子。楊朱之學。如此其盛。乃缺而不舉。遺憾多矣。西方之學亦未一及且所論者。除墨翟。惠施。

之外皆非其本派中之祖師也。若乃子思孟軻本與荀同源而其強辭排斥與他子等。蓋荀卿實儒家中最狹隘者也。非徒崇本師以拒外道亦且尊小宗而忘大宗。雖謂李斯坑儒之禍發於荀卿亦非過言也。李斯坑儒所以排異己者實荀卿狹隘主義之教也。故其所是非殆不足採。藝文志亦非能知學派之真相者也。既列儒家於九流則不應別著六藝略。既崇儒於六藝何復夷其子孫以儕十家。其疵一也。縱橫家毫無哲理小說家不過文辭雜家既謂之雜矣豈復有家法之可言而以之與儒道名法墨等比類齊觀不合論理其疵二也。農家固一家言也但其位置與兵商醫諸家相等農而可列於九流也則如孫吳之兵計然白圭之商扁鵲之醫亦不可不為一流。今有兵家略方伎略在諸子略之外於義不完其疵三也。諸子略之陰陽家與術數略界限不甚分明其疵四也。故吾於班劉之言亦所不取。莊子所論推重儒墨老三家頗能繫當時學派之大綱。天下篇前一段所謂內聖外王之學者指儒家也。宋鉅尹文墨派也。彭蒙田駢慎到老派也。莊子本身老派也。惠施名家言亦與墨子太取小取等篇相近。近于墨派也。篇中一唱三嘆者惟孔墨老三家實能知學界之大勢也。然猶有漏略者太史公同馬之論則所列六家五雀六燕輕重適當皆分雄于當時學界中旗鼓相當者也。分類之精以此為最。雖然欲以觀各家所自起及其精神之所存則談之言猶未足

焉耳。今請據羣籍審趨勢自地理上民族上放眼觀察而證以學說之性質製一先秦學派大勢表如左

先秦學派



(此節未完)

法律

法律平談

馮邦幹

吾人處于文明之世。一舉手。一投足。莫不有法律。日中萬般之事。不能出此範圍。吾人處此範圍中。而僥倖不自知。其危有甚于盲人騎瞎馬者。法律之關係于人身。可謂最切。然而法理甚深。從來說者多辭約而難喻。其名詞艱深。其研究之方法駁雜。常人未易探知。終以此切要之法學。歸為學者之私有。此事雖稱為文明諸國民。亦不免有此缺點。況我中國今日。更無論矣。竊我中國歷來科學之最大缺陷。莫如法學。雖自古聖賢。說道德仁義之理不少。而於法學之理。則噤然不道之。非不道之也。實無是思想也。其所以不發生此思想之故。別有原因在。茲姑讓于他說而不論之。僕深慨于此。欲廣輸入法理于國人之腦裡。以稍補此大缺。因特創為談話體。以平易之語。演說其要領。令閱者一覽即解。其于法理普及之法。或有少補乎。 著者識

第一談 論學法律之要

諸君諸君。僕今日欲向諸君說法律之綱要。使人人知其大體。因爲數十席話。以與諸君相談。今於開始之際。有一話不可不先言者。諸君心中。必以爲學法學之事。乃學者之任。非一切人所過問。僕不應對一切人喋喋繁言。不知實不然。凡爲國民。已是法律之群內之一人。不能不受法律之統御。無論何人。其人之利害無不與此關係。可知法律是人人所應知也。故僕於開論之始。首略說學法律之要。請諸君潛心靜慮以聽之。吾國之俗語曰。不知者不罪。此是一私人對一私人之語。道德上之格言也。至若法律上則不然。法律一經制定發布之後。即有強行力。以實施其法。何謂強行力。強行力者。國家以其強力。令人人不能不服從其法律。有犯之者。即加之制裁。其制裁之行。只問犯法律之所規定者與否。而不問犯者之知法與否也。故此力又名爲強制力。又法律之原則曰。不得以不知法律規則之故爲無犯意。此原則天下各國皆採用之。不特一二國爲然。彼何故皆用此原則。蓋各國皆於制定法律之後。必以之頒布於國中。令人民皆知之。既頒布之後。則人民服從之義務生。又據法律之理。一法律既頒布。則以全人民普知爲推定。推定云者。謂雖或實有不知之者。然于理論則作爲知之也。

故苟不知法律。亦不能免其義務責罰。若然。吾人之講求法律。可不謂切乎。諸君諸君。吾人言至此。固爲之悚然。今吾人若不細思則已。若細思之。更有可慄者。試問吾人千人中。有一二人曾讀現行之大清律例乎。夫法律之條文。非徒讀之即可了解。況不讀之乎。外國之頒布法律。初載之官報。繼而各書店廣刻之。以最賤之價售于全國中。令婦孺貴賤皆得而閱之。然外國之學者。猶常慨歎法律之思想未能普及國民。蓋以只讀法律之條文。未能盡知法律之本領故也。吾國自古來頒布法律之法。甚不備。商鞅懸法于市。知者甚僅。史言漢高帝與民立法三章。不及其頒布之法。其果有頒布否。今驟難信之。自唐宋以來。其法更秘。以爲民可使由而不可使知。於官役之外。無知之者。本朝仍守此主義。民以讀法爲禁。即官役之中。舍司刑獄者。亦鮮知之。嗚呼。哀哉。吾人於不知不識之中。陷于法網者。不知幾何人也。今吾國人。被此主義深侵其腦。謂學法之事。與吾儕小民無與。置之漠然。如秦越之不相關。不知今世政治之真理。大明陳舊之主義。翻然一新。今日之主義。是民可使由之。民可使知之也。此風潮之勢。猛于三峽之水。其一時盡風靡天下無疑。吾國早晚間亦必採用此主義。吾人趁今日

養成法律之思想。以補往日之大缺。急不容緩也。

法律是規定吾人權利義務者也。故學法律則可以明自己應行之義務及應有之權利。明此則可以不至怠其義務而陷于不測之災。且可以藉法律爲吾人權利之堅城。而不至爲他人蹂躪。又明此則可以添其勇邁進取之氣。蓋權利義務之界明析。可不懼爲奸譎之犧牲。而敗績于利益競爭之場裡也。泰西諸國民之權利思想甚富。以人多知法律之故。昔羅馬人之解法律曰。『法律者。包含天地萬般之事。且辨識人之正不正之學也。』此定解雖失于太汎。然彼早已知學法律爲群內人之要事。且最有益者也。彼於古代尙然。况吾人當今日交際頻繁之世。人我之關係甚密。一方則權利生。一方則義務起。其連絡益繁。而規定之之法律愈緻密。吾人立于此活動進化之群內。欲盡其義務。完其權利。當益知學法律之要。

說者或謂世界愈進化。諸事愈頻繁。而分業之事益精細。法律之事自應委之專門學者。不宜一切人民皆兼學之。其說實甚謬。夫法律之關係于人。實與他學不同。蓋他學可離各人獨立而無害。不必凡人皆知之。而法律則大反是。苟有一事最可取譬。夫術

生之學。本屬醫學之一。若以或者之言推之。則衛生之學。吾人不容過問。只委之醫學者足矣。豈知醫學者知之不如自知之切。蓋醫學只能施之病起之後。病未起之前。其攝生全在各人自身。吾人之不可不知法律。猶不可不知衛生學也。况已身之權利。安可不自知而委之他人哉。吾說至此。可下一定語曰。衛生學之細理。應委之專門醫者。其大則應人人皆知之。法理之精奧。可委之專門法家。其要領應人人皆學之。法律者何。是規定個人對個人及個人對國家之權利義務也。吾人處於人群之內。終日不外乎個人對個人及個人對國家之事。故一舉手一投足。皆在於法律範圍內。此規定個人對個人之法律。概名之爲私法。個人對國家之法律。概名之爲公法。公法私法之精細區別。雖或不只此。而其大端不外是也。今略分論之。使知吾人常出入不離此二者之外。

寢假使吾人如羅敏孫古魯蘇。Robinson Crusoe 索居絕海孤島。饑食渴飲。釣于水。鮮可食。採于山。美可茹。絕不與他人相交。唯與木石居。與鹿豕遊。則吾人可放縱恣橫。走豎飛。一任自由。於是法律可不生。蓋法律是如前所說。爲規定權利義務而設。權利


義務是對他人而生。故苟無他人則權利義務自消。吾人今既不能超乎人群之外獨居索處。則必有他我之關係。有他我之關係。則我有對他應爲之事。此是我之義務。他亦有對我應爲之事。此是他之義務。此等義務名爲的義務。又有我對他不應爲之事。此亦我之義務。有他對我不應爲之事。此亦他之義務。此義務名不爲的義務。此爲的義務。於法學之語。常呼爲積極的義務。或正義務。不爲的義務。常呼爲消極的義務。或負義務。既有義務。則必有權利。權利云者是對義務而言也。何謂對義務而言。如甲對乙有義務。則乙對甲自有權利。譬如買賣之事。買者有交錢之義務。則賣者自有得錢之權利。賣者有交貨之義務。則買者自有得貨之權利。權利義務實一對待之言也。諸君諸君。吾等今既知凡有他我之關係。則自然有權利義務起。有權利義務則必有法律起。蓋法律者所以安固吾人之權利義務也。吾人又既知不能如羅敏孫古魯蘇索然自處于天地之間。他我之關係。是自然不可避。若然。吾人安能逃于法律之範圍乎。既不可逃。又安可不明此規定個人與個人關係之法乎。

希臘大哲亞里士多德曰。『人乃有政治天性之動物也。』此語爲不磨之金言。人類因

此固有天性。漸發達而成爲政群。政群云者。質言之。即國家。國家者是吾人生活上第二層要重堅城。不可無也。夫吾人既知構造國家出于人類固有天性。乃自然之勢。又當知國家是吾等各個人結合而成。各個人是國家之一分子。個人之與國家之關係。應甚密。今有規定此個人與國家之關係者。此即所謂法律。吾人與國家關係既密。則法律之與吾人相關。自不得不密。若然。則安可忽之而不顧乎。

僕于此回談。席將畢。更有一言。僕與諸君談法律。非取大清律例大清會典逐條疏解。乃欲述近世法理之大要耳。或曰。何故舍現行之法不說。而對一切人民論不實用之虛理。非急其所緩。而緩其所急乎。答曰。不然。今日所謂疏解法律者。非徒考據法律之文字。乃以最新之法理釋之。故其解法律。其爽快如庖丁之解牛。法文之合于法理否。一若濫驕之燃犀照渚。鬼曲神邪。皆豁然盡露。莫之能遁。若是能令讀者知某法適于理。某法未盡合于理。某法全與理相背。養成人民之別擇性。明某法宜存。某法宜廢。某法宜增。某法宜損。於是法律日日進步。國民之幸福隨之而增。吾國刁筆吏之解法。則異是。不求法理。唯捕捉法文之一二字。以營奸曲。故中國之法律毫無進步。而國民雖

積年累月。猶沉淪于不幸之苦境。僕今不欲如刁筆吏之解法。徒取現行之法。呆然釋其一二文字。雖然。至若以法理解釋現行之法。請俟異日。其故一則因卷帙浩繁。二則因不適法理之處甚多。且此是學者之業。非涉及精細不可。故今不從事于彼。而特取人應知之大綱。以爲談席之話柄耳。



雜俎

外洋入口之竹頭木屑

▲無烟政府。英國政府有無烟政府之目。蓋因政府各大臣。吸烟者甚少也。其首相沙士勃雷及戶部大臣巴科以下皆全不吸烟。惟內務大臣列治及理藩大臣志亞巴麟偶一用紙烟。然不好之。

▲吸烟大王。世界古今吸烟最多之人。當以美國愛的森先生為首。先生者。即創製留聲機器之人。於電學發明最多者也。當其用心思試驗學理之時。大率每日吸最濃之呂宋烟三打。常日亦吸一打。內外或規之曰。此於衛生有害。宜稍節之。先生曰。吾之吸烟已成習慣。與飲食等不能為害。且我全家皆吸烟。吾祖父最愛嚼烟餅。而壽至百三歲云。

▲婦人政黨。頃法國巴黎新立一婦人政黨。海軍提督多哥比兒之夫人實為首領。凡國中最有力之婦人。皆入黨云。

▲學。而。後。嫁。英。國。塞。兒。士。地。方。新。設。一。婚。姻。專。門。學。校。其。教。授。之。科。目。總。以。養。成。可。爲。主。婦。之。資。格。凡。割。烹。針。滌。澀。濯。等。皆。教。之。又。加。身。體。之。訓。練。如。生。理。學。醫。學。亦。其。一。門。云。以。兩。年。爲。卒。業。之。期。

▲遺。產。分。貓。法。國。有。一。老。女。臨。終。時。分。授。遺。產。其。所。愛。之。貓。每。年。給。與。一。百。二。十。圓。爲。其。貓。診。病。之。獸。醫。每。年。給。五。圓。其。遺。囑。書。登。於。新。聞。紙。人。之。欲。得。爲。其。貓。者。不。少。然。其。遺。族。以。爲。不。過。是。亂。命。耳。訴。於。法。廷。法。官。以。爲。貓。也。者。不。能。享。民。法。上。之。權。利。者。也。故。判。此。百。二。十。元。仍。歸。遺。族。其。獸。醫。之。五。元。則。可。受。云。

▲葬。犬。盛。儀。仲。尼。曰。敝。蓋。不。棄。爲。埋。犬。也。葬。犬。之。事。本。古。今。東。西。所。常。有。而。美。國。此。風。尤。多。頃。有。紐。約。一。婦。人。葬。其。愛。犬。衣。衾。棺。槨。豐。盛。擬。於。王。侯。送。葬。之。時。奏。樂。不。絕。

謂。將。以。慰。其。靈。魂。又。爲。此。犬。立。墓。志。銘。云。

▲地。底。鐵。路。美。國。紐。約。市。頃。開。地。底。鐵。路。自。西。歷。一。千。九。百。一。年。三。月。開。工。現。在。工。場。操。作。者。約。八。千。人。自。開。工。至。今。凡。費。去。九。百。七。十。萬。美。銀。其。估。價。合。同。共。需。費。三。千。五。百。萬。美。金。即。七。千。萬。元。中。國。通。用。銀。

▲新婚游歷。西人新婚之後。男女必相携游歷他地。好奇者演種種異色。或乘自由

車。中國人號爲獨脚車或云脚踏車以其名不雅馴改定今名或乘輕氣球。不一而足。最奇者則近日美國有一船長新

結婚。挈其夫人。同乘一小船。船長僅二丈。將橫斷大西洋。以達歐洲。現已起程矣。

▲法兵自殺。據法國軍事叢報所統計。法兵之自殺者。較列國爲最多。計兵士死者

千人中。其自戕者。平均五十人。每十萬兵士中。一年內必有二十七人自戕云。

▲徒步環球。英屬加拿大有名格利托別者。與人相賭。徒步環游地球一周。得十萬

元之彩。此人距今六年前。由加拿大起程。徧歷諸地。其到滿洲時。恰值義和團發難。

爲亂民所捕。幾不免。經兩月乃放之。更往海參崴。前月經橫濱。歸於加拿大。

▲書籍入美。美國多外國人入籍者。故入口書籍亦極多。計千八百九十年入口之

書籍及樂譜地圖等。凡值美銀三百九十九萬四千餘元。千九百年則減至三百五

十七萬餘元。人口增多而其數反減少者。蓋自印書之業日盛也。

▲成人徽章。美國紐查士省。數年前。制定法律。凡男子公然與婦女接吻者。有罰。及

此法實行後。徃徃有旣婚之男子。與其妻告別。而舉行此典者。亦被捕縛。於是覺其

不便。乃擬於本年議院。提出一案。凡既婚之男子。皆佩一徽章。以示識別云。

▲月中噴火。頃法國天文臺大天文家某用巴黎博覽會之大遠鏡。測出月球內有黑烟噴出。無時休止。此事若確。則從來學說。將爲之一變。舊說言月中無空氣。使無空氣。則物不能燃。今月中既有火山。則是有空氣之證也。舊說言月球熱氣已盡。其內部全冷而成定質。但既有火山。則是其質未盡凝也。果爾則天文學界中。又當添一新公案矣。



輿論一斑

論英日聯盟

西二月十二日。英日兩國聯盟成。其大旨係維持遠東和平大局。保全中韓兩國土地及自主之權。云云。夫以二萬萬里四萬萬人之國。而被保護于東西之區區三島國。不知我國人對之。其有動心焉否也。各地報章。亦多論列此事。茲擇其說尤切要者錄之。上海中外日報曰。

英日兩國於西歷正月三十號新定保全東方和局之約。英日兩國報章。咸有幸詞。竊謂英報之有幸詞也宜也。英之殖民地遍於天下。中國商利之入於英者實居大半。顧以區區三島。控制全球。實有鞭長莫及之勢。今得日本與之聯盟。則英之所欲防遏者。日本已代爲防遏之。英之所欲保全者。日本已代爲保全之。是直於亞洲地面得一極有權力之友邦。爲之聯絡其聲勢。鞏固其基址。是可幸也。日本報之有幸詞也宜也。日本自維新以還。國勢已蒸蒸日上。自中東一戰而後。遂興高采烈。有與

歐洲諸大國並駕齊驅之意。今日與英國聯盟。外以杜強鄰之侵軼。內以固同洲之唇齒。是可幸也。所難堪者獨中國耳。中國自道光以後。與西人交涉。無一事不出於戰。無一戰不歸於敗。甲午之役。情見勢竭。大勢幾不可復支。庚子之役。鹵莽啓釁。國是愈不可爲。由是內外士人汲汲顧影。朝不保夕。聞他國之欲瓜分我也。則以爲戚。聞他國之欲保存我也。則以爲喜。夫瓜分我者。我固知其不可恃矣。而彼日以保存爲言者。不嘗壟斷中國之利權。欲一網打盡乎。不嘗明目張胆。與他國立互保權限之約。爲無形之瓜分乎。於此而一以爲戚。一以爲憂。是直任他人之侮弄。而不自覺。聽他人之顛倒。而不自知。其視日人以新造之邦。締交強國。雄峙於歐亞之間。爭雄於東西之表者。不其遠乎。故敢敬告當軸諸公曰。諸君子毋以英日聯盟爲中國可幸之事也。英願聯日。日能聯英。而我方仰人鼻息之不暇。其可恥者一矣。約中大旨以保全中國土地爲言。夫我國歷來公私文字。不嘗自命爲一統之國乎。不嘗曰蒞中國而撫四彝乎。陵夷至今。乃至待保全於英日。其可恥者二矣。高麗舊爲我藩屬。其稱我也曰天朝。其自稱也曰小邦。今我乃與高麗同受保於英日。其可恥者三矣。

是故英日聯盟之舉。我國君臣上下不可引爲前車之事也。直當引爲大恥。而臥薪嘗胆。勵精圖治。思所以雪恥之道。其庶幾乎。其庶幾乎。否則沈睡於厝火之旁。酣歌於漏舟之中。幸外侮之暫緩。忘內政之已敝。猶欣欣然語人曰。他人必保全我。他人必不傷害我。以自解自慰之詞。爲得過且過之計。則試問人之保全我者何意。他人欲保全我而乃特立一約者又何意。奈何不以爲恥而以爲幸也。則誠不能不痛哭流涕一爲當軸告者也。

上海新聞報曰

俄國居地球之北。橫跨歐亞兩洲。其人有堅忍之性質。雄偉之軀體。而其國君自大。彼得以來。世守蠶食之宗旨。沈毒陰狠。莫可窺測。版圖日增。每爲他人所不及覺。故歐亞各國皆忌之。歐洲各國之忌之者。以英國爲最。蓋以英國之強大。其在歐洲。顯然有獨執牛耳之勢。一旦俄人得志。則歐洲之權利。必致盡屬於俄。而英國有土崩瓦解之禍矣。故創聯盟之說。保全土耳其。使俄國海軍不得出黑海。以絕其西路。俄人既絕西路。乃銳意於東亞。英人復大懼。念中國地大物博。立國最久。當必能藉以

拒俄。故從前英國之待中國。最爲和平。索還伊犁之役。許爲隱助。及至久而久之。見中國上下泄沓。不足有爲。而日本自明治維新。頗有勃然而起之象。遂移其厚中國者以厚日本。夫歐洲以英國爲大。其防俄也無微不至。亞洲以中國爲大。而嘗有虎狼之俄。曾無絲毫防維之意。轉使日本島國。獨任其肩。可不痛哉。日本既有防俄之志。必先爭雄長於亞洲。念壤地褊小。不足以有爲。遂有甲午之役。當弊端初起時。中國屢請英國調停其間。英國若即若離。以釀成戰事。蓋亦輕中厚日之念。有以致之。實欲日本崛起於亞洲。以樹其防俄之奧援也。至於戰事中止。中日言和。俄假仗義之名。索還遼東。並干預朝鮮政事。遂使朝鮮爲俄日平權之地。遼東爲俄人獨占之地。東亞權力。有駸駸乎盡入於俄之勢。較之甲午以前。尤爲可懼。蓋日人勞力以奪之。俄人安坐以享之。非特日人所不料。亦豈英人所及料哉。迨庚子俄人假勦捕拳匪之名。全佔東三省。久而未還。日人益大懼。日本議士遂創日俄聯盟之說。謂聯盟以後。日人不復干預東三省俄人之事。俄人不復干預朝鮮日人之事。權利既分。日人尙不致向隅。否則恐東三省不能爭還中國。而朝鮮權利亦不能獨得。反不若會

大取小。舍難取易之爲得也。此說一起。日俄各報章多有附和之者。至謂駐俄日使調任外務部總務長官。即是此意。當時駐華俄使亦乘機逼迫李文忠簽劃新約。文忠逝世。而中俄新約。大加刪改。頃俄使已允中國所改。惟別索利益以相抵。中國全權又將許之。不知英日聯盟之約。已於西正月三十號簽押。爲中俄交涉易於着手之大機會也。俄人之意。謂地球各國可以爲敵手者惟英國。今英日既已聯盟。則俄人之氣必爲之懾。苟與中國所議之約不能遽定。甚至於決裂。必致英日兩國從而干預。而毫無利益之可得矣。故當此之時。中國全權益宜堅持以保全東三省之權力。嗚呼。中國固亞洲之大國也。不知防俄。不能防俄。而日本反崛起。與英國聯盟。謂互相保全中國朝鮮土地。遂使皇皇大國。下與土耳其朝鮮爲伍。可不痛哉。雖然。歐洲有英國以防俄。亞洲有日本以防俄。而英日兩國亦復聯盟。是俄人大志一時尙不能逞。中國於此而亟圖自強。未始不可以有爲也。

北京順天時報曰

今試執環球之交涉家。卽以日英聯盟。其於亞東大局之關繫。爲損乎。爲益乎。則必

曰爲益也。復叩以日英聯盟。其於中國完全獨立之主權。可永保乎。不可永保乎。則必曰不敢知也。一言以蔽之曰。視中國之能否自強而已。能自強。則聯盟與中國大有益。不能自強。則聯盟與中國更有害。何以言之。我之所以貴乎能變法者。內政也。而外交之不善。猶足以掣內政之肘。至於勢窮力竭。雖有神奇英武之略。無復可施。昔吳王夫差待命於姑蘇之臺。行成之使者往而復來。而范蠡擊鼓興師以隨其後。法皇拿破崙再放於希利納海島。卑禮巧言。求爲一軍之渠帥。不可復得。此二君者。豈非人傑哉。使此難得脫。成敗偶然耳。子輿氏之言曰。國家閒暇。及是時。明其政刑。言時不易得。而機不可失也。同盟之益於中國。謂可藉其攝距抵制之力。急急焉以修我內政而已。所謂能自強則大有益者此也。我不思自強。則無所愧恥。無所恐懼。文恬武嬉。若醉若迷。如虛怯疴瘠之人。生機已絕。則必朝進參著。夕餌醢粥。以多延時日爲幸。族黨鄰佑。懼其傳染。鳴鼓燃礮。以驅疫氣。又掖此疴瘠者相與共逐之。邪正搏擊。元氣散竭。而軀命立亡。今同盟有所維持。則必有所抑制。有所保護。則必有

所戰爭。而以不變法之中國當之。百年維持而無益。一日爭戰而即亡。信乎吾取鑒所云也。所謂不自強則更有受害者此也。且其第一款條約中。固已明明言之曰。英所繫之利害在清國。日本所繫之利害在清國。而尤在韓國。此其自衛之心勝乎。抑扶持大局之心勝乎。其必先私而後公也明矣。以逆億之見揣之。意此約之外。或當更有密約。設中國因循依舊。大局決裂。魚爛瓦解。不可維繫。則將改變爲分割主義。另有一實顧利害之辦法以自救。此亦二國切膚之謀。不得不然者也。吾以爲二國聯盟之心已久矣。所遲遲未發者冀中國萬一自強。則英人工商殖民之利。可以長保。韓人亦得聯合犄角之益。歸然爲遼海東亞之屏蔽。而日本自即於泰山之安。又何必明目張膽。刑牲載書。以表異於列國。而召強敵之忌哉。夫有所大不得已也。故吾得而直斷之曰。日英之同盟。知中國之必不能自強也。不能自強。則雖同種之兄弟。方將蹙額掩淚。分一杯羹。以贍其死命。又何望他人之恤我哉。嗚呼噫嘻。事急矣。時迫矣。我猶遲回。人不我待矣。恐濯修省以持之。破除積習以行之。實事求是以堅之。小心定力以終始之。卑詞屈節以要結之。藉天之靈。得人而理。或者其有轉機乎。

上海蘇報曰

去年有英德之約。今日有英日之盟。凡以抑方張之強俄。扶瀕亡之中國。以保全東亞而已。夫實逼處此之患。彼如此其皇皇汲汲。而我中國則不聞有一審時度勢之外交家。於唇齒之誼。與縱橫之計。稍致其意。徒日以聯俄聞。日以俄約聞。一誤之不足而再誤。再誤之不足而三誤。樞垣譯署。造膝以陳。但及邦交。如出一吻。雖以江督之見嚴憚。鄂疆之見倚重。聯翩電奏。而無以收回天。之效。又何怪臺諫之甘爲伏馬。士夫之噤若寒蟬哉。考其因緣。蓋有三悞。究其所悞。起於一私（中略）凡此二私。自非文明底於極度之國。鮮所能免。但視所以用其私之政策何如耳。中國縱不能去其私。或猶冀有善用其私之一日。乃不意戊戌以後。遂以外交之私。濟其內政之私。並以一二人之私。牽合其外交之私。其於外交。殆無所措意。非特不知何者爲世變。何者爲遠慮而已也。但助成其自相殘賊之舉者。即爲所依賴。雖舉土地人民財賄以奉之而不惜。有持公私顧大局反對其自相殘賊之舉者。遂爲仇讎。雖明知爲國家所必依賴之國。而無所用其周旋。故前之引虎狼而親之。私潛近於公。獨庚辛之

開釁召侮。則內政之變相。非外交之結果。向者之私。轉爲所託以爲公矣。今雖前車之鑒。有所懲創。然向之二私。與夫後之一私。猶若輾轉而不能釋用。是之故。終不肯移其親俄之意。以用於英日德美諸邦。而其言則曰。聯英聯美聯日。皆與聯俄無異。吾今者惟自立焉。此無論其能否知聯俄之誤。能否自立也。即令果不聯俄矣。果能自立矣。天下豈有貧弱如中國。而可以無所聯合以立國耶。夫所謂聯合者。非如中國向日之聯俄也。借其利己之策。以助我抵制之力。如今日之英日互倚以拒俄。是已。拒俄乃可以保亞。保亞乃可以保歐。日之爲此保亞也。英之爲此保亞以保歐也。惟東西相去二萬里。各據其土地人民。自今以後。獨於拒俄以保亞。保亞以保歐。二國如一國矣。此其聯合。烏可少哉。我中國爲亞洲最大之國。而無與於保亞之盟。吾不知將來何以自立於亞洲也。彼靦然不知愧者。方且曰。英日旣合。知以保亞拒俄矣。其必保我中國可知。吾庶幾免乎。此殆如自壞其牆壁。自毀其門戶。而偃然高枕於鄉里之守望也。縱其鄰里不爲盜。獨不思守望於吾門外者。漸將守望於吾室中乎。迨其守望於我室中。雖不爲盜。而我已不啻舉室奉之矣。不寧惟是。高枕於鄰里

之守望。其害猶緩。或且疑其守望之將以盜我。則竊盜以疎鄰里。必將陷於甘言。給於危詞。而終用其前日之故智。然則英日之合約。其意雖主於扶中以保亞。亞則庶幾其保矣。我中國之能否比於朝鮮。以暫庇於二國之夾持。徐圖其自強。則固未可知也。爲土耳其乎。爲波蘭乎。前途窈然。吾烏足以測之。



小說

十五小豪傑

法國焦士威爾奴原著
少年中國之少年重譯

第三回

放暑假航海起雄心
遇颶風片帆辭故土

前回講到武安絞下盤渦裏去。連影也不見。看官啊。你不必著急。這武安是死不去的。他是這部書的主人公。死了他那裡還有十五小豪傑呢。卻是前兩回胡亂講了許多驚心動魄的事情。到底這些孩子們是那國的。是甚麼種類的人。這胥羅船到底欲往那裡。爲何沒有船主。祇剩這幾位乳臭小兒。我想看官這個悶葫蘆。已等得不耐煩了。如今趁空兒補說一番罷。……話說南太平洋地方。澳大利亞洲南便。有英國屬地一座大海島。名叫做紐西崙。那海島最大的一箇都會。名叫做惡崙。那都會一箇最大的學校。名叫做奢們。那學校的學生。英美德法各國人都有。大率島中田主巨商官吏等有名望人的子弟居多。這紐西崙乃是合南北兩大島及附近許多島嶼而成的。南島

北島中間有一葦衣帶水。叫做曲海峽。就是取那環游世界開闢新地有名的級頓曲之名。做過紀念的意思。澳洲檀香山紐西蘭等地皆級頓曲所尋得後為檀島土人所戕。這座羣島橫亘於南緯三十四度至四十五度之間。和我們北半球的法國美國日本國同一樣度數位置。那北島西北角狹而且長。成箇半島的模樣。三面臨海一面連陸謂之半島。那半島的頸。不過二三邁闊。這惡崙市正在那頸上。……一千八百六十年正月十五日午後。就是這學校放暑假的日期。一百多名學生。箇箇好像出籠鳥一般。欣欣然歸家去了。這兩箇月內。是任從他們自由的。這裏頭有一班孩子。許久想繞著這紐西崙羣島沿岸。環游一周。便趁著這空兒。各各稟准他的父母。約定同行。恰好就中一箇名叫雅涅的。他父親有這號胥羅船。於是各人湊些費用。預備齊全而往。……卻說英國學校寄宿舍的風氣。是與別國不同的。專設種種方法。養成學生自助自治的習慣。所以那生徒的心思。身體。都比他國人長成得快些。有一種少年老成樣子。奢們學校學生。共分五級。那第一第二級的。尙係和他父母接額為禮的小孩。西人十歲以下童子見所親皆接額為禮。第三級以上的大率皆握手為禮的長童了。英國學校風氣。長年生有保護幼年生的義務。幼年生的義務。每日送

朝飯。刷衣服。捺靴鞋。種種苦差。總是要當的。倘或懶惰不屑。那長年生便刻薄待他。卻在學校裏頭站不住了。所以英國的小孩子。箇箇都是奉事長上。勤謹不過的……這回搭這號胥羅船去游歷的。共有十四人。自第五級至第一級。都有在裏頭。杜番格羅士都是第五級。年十四歲。皆惡崙市富豪子弟。田產最豐。他兩箇本屬從堂兄弟。杜番天性伶俐。學問優等。但係有一種執袴子脾氣。萬事皆要居人之上。因此各人起他箇綽號。叫做闊少杜番。他看見那同年同級的武安。滿校人都敬重伊。心裏有些不平。每每要和他對拗。這亦是勢所必至了。至於格羅士。卻是一味捧著他那杜番阿哥像。菩薩一般。是一箇平平無奇的孩子罷了。巴士他和杜番同庚同級。亦是市中一个巨商之子。爲人靜和有思慮。勤勉有才智。乙菩十三歲。韋格十四歲。都是第四級的。有中等之才智。父兄親戚。都是富豪官吏。雅涅沙毗兩箇。同庚的十三歲。都是第三級。雅涅的父親。曾做海軍官員。今已退職。沙毗的父親。從英倫本國初來的。亦係箇大富翁。雅涅長愛彈箇小風琴。寸步不離的帶著。沙毗爲人最爽快。好冒險。平生最好讀魯敏孫漂流記等書。再有兩箇都是十歲的小孩。一叫善均。係紐西崙格致學會會長之子。一叫

伊播孫。係牧師之子。善均在第三級。伊播孫在第二級。都是狠超等的。還有兩個卻更小了。一箇名土耳其。一個名胡太。都僅不過九歲。其父皆屬陸軍兵官。土耳其著名的執事。胡太著名的大食。以上十一箇都是英國人。此外還有兩箇法國的。一箇英國的。美國的叫俄敦。年十五歲。算是這一隊裏頭最年長的哩。在第五級。他的才鋒銳利。雖不及杜番。亦不失爲本級中優等生。幼喪父母。受別人養育長大。所以有遠慮。有常識。那法國人兄弟兩箇。兄叫武安。十四歲。弟叫佐克。九歲。他的父親。係一個有名的工學博士。兩年前來到北島督辦水工。武安有絕好的記性。有極熱的感情。聰明活潑。懇切周到。尤用心憐愛幼年生徒。滿校的孩子。箇箇歡喜他。佐克向來在第三級中。最爲劣等。常好欺嚇儕輩。除了這種頑皮舉動外。無所事事。但係自從這晉羅船離了本土以後。他的性格忽然變了。成一箇謹厚寡默的長者。這些孩子們。都覺得出奇。不解甚麼緣故。……按下不表。卻說這晉羅船本有副船主一名。水手六名。厨子一名。細崽一名。細崽就是這個莫科了。那船主便是老雅涅自己充當。這船定期二月十五日午前開行。船主雅涅。是非到拔錨之前半點鐘內不到船的。這十四日晚上。那十四箇孩子。同著

吳敦所養一隻美國狗。名喚符亨的。一齊落船。副船主和莫科都在船上迎接衆人。那水手們卻都到岸上滴兩杯威士忌去了。那副船主等這些孩子上牀安歇後。亦上岸找箇酒店坐坐。船上單留一箇莫科。躲在船頭水手房中。齣齣睡去。這也是大公有意。要把十五箇小豪傑磨練出來。那晚上不知甚麼時候。因何緣故。這船的纜。竟自鬆了。潮水一衝。漸漸將船流到海中心。船上的人。連影兒也不知道。夜色又闇黑。風又大。不到一會。已經流出一里以外。那時莫科睡夢中。覺得這船有些古怪。翻起身到船面一望。看見這情形。便呀呀一聲喊起來。那吳敦武安杜番等幾個年紀大的。連纜起身。走到船面。同莫科一齊大聲喊救。卻沒人聽見。船已自離岸三邁多。遠望那紐西崙市的火光。都漸漸看不見了。武安倡議。不如將風篷扯起來。駛轉舵輪。回到岸去。莫科也是這箇主意。孩子們就大家協力來扯那篷。不料篷太重。孩子們氣力小。扯不起來。眼睜睜看著這船越走越遠了。那陸上求人幫助的念頭。是靠不住了。就使有船跟蹤來尋。但怎麼黑暗的海面。怎能覈看得著呢。就使看得著。那尋的船。也要費許多時候才來得到這裡。他來得時。這船又不知流遠幾多邁了。所以孩子們單有一件指望。僥倖遇

著有別的船從他處來紐西崙。望他打救便了。莫科便將桅燈高挂起來。做箇識認。那時這年紀小的全都熟睡。驚醒他也是無益。所以由他們罷了。武安等一面設盡方法。想轉過這船來。總是不能成功。越發向東流去了。忽看見前面二三邁遠的地方。有一點白色。分明是一隻大輪船。歇一會又看見一紅一綠的兩個燈光。那船一定是向一條直線對正我們來的了。孩子們拼命劈喉喊救。無奈那波濤洶湧的聲音。機器鞴輪的聲音。和著愈吹愈緊的大風聲音。把孩子們的聲都蓋過了。來的船如何聽得見呢。雖然如此。但係有船上的桅燈。應該望著。卻是天不湊巧。船一傾側。忽將燈繩刮斷。那燈竟自掉落海中。如今連一點識認都沒有了。看官知道。那輪船是一點鐘走十三邁的。不到幾分鐘工夫。他便從胥羅船尾一掠過去。把船尾上寫著船名的一塊板兒刮落。飛的一般走向西方去了。船越行越東。不一會已到天明。四面張看。連一片帆影兒都沒有。原來太平洋這一邊。船隻來往。本是極少。那從美洲走澳洲的船。大都在北方居多。孩子們整整望了一日。不見一隻船。天又黑了。夜又來了。那天氣比前夜更是古怪。風越發緊。東行越發速。却說武安雖是小小年紀。他那膂力勇氣。是老成人都趕不

上的。因此大家都靠著他。便是剛復自用的杜番。也不能不聽他號令。所有駕駛這船的事情。全由武安一人主持。杜番只是日連夜夜連日。時時刻刻望著地平線上。萬一碰著個遇救的機會。免令錯過。經了幾個禮拜。未嘗懈倦。或將遭難始末。書了許多。用酒罈子裝著。投入海裏。或用言語慰安那年紀小的。叫他們勿喪氣。這也算他盡心盡力了。無奈那無情的西風。總是把船越驅越遠。那後來的事情。看官在第一回是看見的了。只緣這胥羅船離岸後不到幾日。更起一箇大颶風。經兩禮拜之久。自西吹向東來。幸虧這胥羅船都還堅固。不然。早已被怒濤打碎多時了。……那晚上船主雅涅知到胥羅船沖去的事情。和那孩子們的父兄。箇箇都是驚皇憂慮。自不待言。他們立刻派兩隻小火船四面走尋。尋了一日。都是空手而回。這還不算。却執得胥羅船尾之木板一塊。分明是船沈了。孩子們都淹死了。那父兄親友都不免一場痛哭。不必細表。正是

天涯游子無消息。白水青山空哭聲。

究竟這孩子怎麼能殼上陸。那陸上係甚麼地方。下回再表。

學生放假時。不作別的游戏。卻起航海思想。此可見泰西少年活潑進取氣概。

英國人最貴自由。此全球所共知也。而其在學校中。幼年生服侍長年生。若厮養然。吾初游美洲澳洲各學校。見此風氣。心頗怪之。殊不知自由與服從兩者如車之兩輪。鳥之雙翼。相反而相成也。最富於自由性質者莫英人。若最富於服從性質者亦莫英人。若蓋其受教育之制裁者有自來矣。立憲政體之國民。此二性質缺一不可。盎格魯撒遜人種所以獨步於世界。皆此之由也。近世後生小子。或耳食一二自由平等之理論。輒放恣無復紀律。是安得爲真自由哉。

盎格魯撒遜人。凡於各團體中。無論大團小團。皆聽其自治。如一學校。其中規模。殆與一國無異。長年生與幼年生。即治者與被治者之兩階級也。而長年生既享有受服侍之權利。即有應盡其保護幼者之義務。權利義務。一一分明。及其出學校而任國事。亦若是則已耳。英國之學校。無一而非實務教育。即此可見其概。

佐克自經患難後。全變其氣質。爲一完人。患難之福人大矣哉。此等機會。人生所最難遇也。苟遇此者。豈可錯過。有負天心仁愛耶。

飲冰室詩話

飲·冰·子

我生愛朋友。又愛文學。每於師友之詩文辭。芳馨悱惻。輒諷誦之。以印於腦。自忖於古人之詩。能成誦者寥寥。而近人詩則數倍之。殆所謂豐於昵者耶。其鴻篇鉅製。洋洋灑灑。行將別裏錄之爲一集。亦有東鱗西爪。僅記其一二者。隨筆錄之。

譚瀏陽志節學行思想。爲我中國二十世紀開幕第一人。不待言矣。其詩亦獨闢新界。而淵舍古聲。丙申在金陵所刻莽蒼蒼齋詩。自題爲三十以前舊學第二種。蓋非其所自憲者也。瀏陽殉國時。年僅三十二。故所謂新學之詩。寥寥極希。余所見惟題麥孺博扇有感舊四首之三。其一曰。無端過去生中事。兜上朦朧業障來。燈下惘惘誰一劍。尊前屍塚夢三槐。金裘噴血和天鬥。雲竹聞歌匝地哀。徐甲儻容心懺悔。願身成骨骨成灰。其二曰。死生流轉不相值。天地翻時忽一逢。且喜無情成解脫。欲追前事已冥濛。桐花院落烏頭白。芳草汀洲雁淚紅。再世金環彈指過。結空爲色又俄空。其三曰。柳花風

有。何。冤。業。萍。末。相。遭。乃。爾。奇。直。到。化。泥。方。是。聚。祇。今。墮。水。尙。成。離。焉。能。忍。此。而。終。古。亦。與。之。爲。無。町。畦。我。佛。天。親。魔。眷。屬。一。時。撒。手。却。僧。祇。其。言。沈。鬱。哀。豔。蓋。瀏。陽。集。中。所。罕。見。者。不。知。其。何。所。指。也。然。遺。情。之。中。字。字。皆。學。道。有。得。語。亦。瀏。陽。之。所。以。爲。瀏。陽。新。學。之。所。以。爲。新。學。歟。

戊戌去國之際。所藏書籍及著述舊稿。悉散佚。顧無甚可留戀。數年來所出入於夢魂者。惟一菊花硯。硯爲唐瀏陽所贈。時余承乏湖南。時務學堂講席。初與紉丞定交也。譚瀏陽爲之銘曰。空花了。無真實。相用造前傷。起衆信任公之研。佛塵贈兩君。石交我作證。其時江建霞方督湘學。受代去。瀕行前一日來作別。見研與銘。乃爲余刻之。今贈者。銘者刻者皆已沒矣。而此研復飛沈塵海。消息杳然。恐今生未必有合并時也。念之凄咽。

近世詩人。能鑄鑄新理想。以入舊風格者。當推黃公度。丙申丁酉間。其人境樓詩稿本。留余家者兩月餘。余讀之數過。然當時不解詩。故緣法淺薄。至今無一首能舉其全文者。殊可惜也。近見其七律一首。亦不記全文。惟能誦兩句云。文章巨蟹橫行日。世界羣

龍見首時。余甚愛之。

嚴又陵哲學大家。人多知之。至其詩才之淵懿。或罕知者。余記其戊戌八月感事一首。云。求治翻爲罪。明時誤愛才。伏尸名士賤。稱疾詔書哀。燕市天如晦。天南雨又來。臨河鳴犢歎。莫遣寸心灰。又綠珠詞一首云。情重身難主。淒涼石季倫。明殊三百琲。空換墜樓人。蓋哭林晚翠也。

康南海之第二女公子同璧。學精史籍。深通英文。去年子身獨行。省親於印度。以十九歲之妙齡。弱質。凌數千里之莽濤瘴霧。亦可謂虎父無犬子也。近得其寄詩二章。自跋云。侍大人遊舍衛祇林。壞殿頽垣。佛法已劫。然支那女士來游者。同璧爲第一人矣。詩云。舍衛山河歷劫塵。布金壞殿數三巡。若論女士西游者。我是支那第一人。靈鷲高峰照暮霞。淒迷塔樹萬人家。恒河落日滔滔盡。祇樹雷音付落花。

高平子以所著平等閣筆記見寄。記述兩年來都中近事。字字令人刮心怵目。中一條。其事甚韻而其人甚奇者。讀之亦可見中國女權消息之一斑也。錄其全文如下。「庚子仲冬。由日本西京偕日友數人乘玄海丸返國。便途得游朝鮮及關東關外諸地。兩

雪。戴。途。寒。風。砭。骨。哀。鴻。遍。野。春。燕。無。歸。觸。目。心。傷。夢。魂。慙。悵。余。有。詩。云。關。山。一。任。誰。家。物。觸。眼。吾。民。百。感。傷。雪。漫。長。空。風。滿。地。瀛。車。載。夢。過。遼。陽。一。日。薄。暮。將。投。逆。旅。適。一。女子。姿。容。倩。雅。妝。服。澹。素。冷。月。凝。暉。寒。山。蹙。翠。携。一。姥。一。僕。匆。匆。更。望。北。發。余。心。訝。之。入。旅。店。中。見。壁。間。題。詩。數。首。墨。痕。未。乾。字。體。秀。逸。其。一。云。本。是。明。珠。自。愛。身。金。鱸。香。擁。翠。裘。輕。誰。為。拋。卻。鄉。關。道。白。雪。蒼。波。無。限。程。其。二。云。明。鏡。紅。顏。減。舊。時。寒。風。似。翦。翦。水。肌。傷。心。又。是。榆。關。路。處。處。風。翻。五。色。旗。其。三。云。無。計。能。醒。我。國。民。絲。絲。情。淚。搵。紅。巾。甘。心。異。族。欺。凌。慣。可。有。男。兒。憤。不。平。尚。有。一。首。字。體。潦。草。不。能。辨。識。噫。嘻。此。何。人。也。問。之。逆。旅。主。人。茫。然。不。答。



紹介新著

和文奇字解

譯書彙編社社員輯著 日本東京譯書彙編社印行 定價一元

日本古代。或曰有文字。或曰無之。自隋唐以來。始假用中國文字。以傳會其固有之書語。故分爲音訓二種。音者照中國本音讀之。訓者以土音註之。使讀者望文生義。故中國文字異聲異形而義同者。彼讀之皆爲一音。不復辨別。故日本文中之漢文。往往有不可解者。然細案之。義亦可通。職此故也。如「由此觀之。」彼往往寫爲「因之見此。」是其例也。此蓋由日本古來尙武。所謂武士。最爲世重。而識字甚少。其寫別字。固不足怪。以日人讀同義之字。大抵同音。如因之見此。以中國讀之。幾不可解。而日本人讀之。其音與由是觀之無異。若字字記得清楚。何處應用某字。非腦滿者不易言。此日本奇字原因之一也。更有一類。日本在中國文字未曾流入之前。已有其言。及得中國文字。始將中國文字之訓或音。與其固有之俗語相合者。漢成之。如ヤハリ。日本俗語猶去依

然。適矢張二字。日人訓之爲ヤハリ。遂取之以代寫其ヤハリ三字。所謂傳其音而不用其義者。以中國人讀之。萬不能通。此日本奇字原因之二也。以上二種。最爲奇中之奇。其外則有日本人自行新造之字。如辻之爲十字路口等是也。又有新疊字眼。如上手之爲妙手等是也。此種細心體認。習之既熟。亦易旁通。且同在中國。亦各處自有方言。彼此不同。况彼國界既殊。自宜有此。若夫日本自名其事物。或從西文轉譯來者。前者多難索解。後者輒有安語。又或沿用內典。此皆驟眼看來。有費人思索者。是亦可算入奇字。而其種類大抵盡在是矣。今中國人讀日本書者日益多。而或未嘗習日語。或習之未深。往往有遇此等字。茫然不知所謂。因而不能得其上下文理。甚至有誤會其意者。桐城陶君特著本書。將此等奇字。苦心摘出。爲下注脚。以便於讀日本書者。其用意至深厚。真堪嘉也。著者叙例有言。因匆促付梓。失漏之處。在所不免。今試檢閱之。其中誠有未盡善處。謹就管見。畧舉數條。以發凡起例。非好求疵。恐誤讀者。反失著者之盛意。故不敢不忠告。以期著者加意改正云爾。

一 全部之大缺點。在于列數見字少。少見字多。未免使讀者有勞多功少之嘆。試繕

數葉。其常見者不過數條。除外則往往讀日本書數百部。尙未嘗一見。著者固有意求美備。然輕重倒置。殊爲欠妥。

二 所註有未與原義吻合。或全誤者。如見込之註爲受惑。頂戴之註爲給與。金儲之註爲利息。前二條是全誤。後一條爲與原義少異。見込本當註爲希望。頂戴爲給我。

一義爲受領給與。一義是客觀的受領是主觀的也。金儲爲獲利。其他尙多。今不枚舉。

三 未能發明通例。如取字打字立字。日文中最喜用之。理宜爲作一解。

四 重出者多。如半產半鐘。同葉兩見。出口出立等。既見口部。又見山部。此固小疵。亦見校對之疏。且出字編入兩部。殊爲失當。

五 有中國文言不待註者。如三元一目。只今命中等是也。

至於不憫之誤作不便等。此是校對之過。無關宏旨。然有此數缺點。令人生美中不足之感。質諸著者。以謂何如。本館某君。久有意著此一書。已從事搜索。惜此君性緩。久之未能卒業。嘗聞其叙例如左。

一 全部分上中下三卷。上卷是最通用之字。中卷是偶見之字。下卷如補遺例。

一編字仍依部首。與此同例。

一注分三類。一用文言。一用正音。一用粵語。求其切當明白。而有時或省爲一類或二類。

一旁註假名。即日本字母以便查日本字典。及便于讀日本書中之多用假名者。副詞最多

一因上條之故。另用假名作檢字一卷。附錄于後。以備由假名查漢字。

一分奇字種類爲別字方言譯語新字四種。各以符號標出。又分爲中國已襲用者。可襲用者。不可襲用者。三種。亦附符號。

一學問上語。分科選錄。別爲一卷。

此其大略也。本館願爲我學界要求某君。速殺青以餉同好。度亦本書著者所同情也。

中國近事

◎大哉皇言。聞日前有人面奏英日聯約于兩宮者。太后以爲此亦好事。或可爲將伯之助。皇上曰。此非吾福也。我不自強。英日其肯爲我助乎。

◎直督密奏。東報載直督袁世凱于正月十日繕具密摺一道。痛陳英日協約有關中國大局。及中國將來之施政方針。其大意如下。竊據風聞。英日兩國政府因思保全中韓兩國主權。及通商貿易各要務。特聯鞏固之盟。以資輔掖。約內大旨謂同盟之國。如此國陷兵禍。彼國當守局外中立之例。如與某國交戰時。于聯盟國大有障害。則彼國當操干戈爲聯盟之應援云云。臣愚以爲英日兩國此次之盟。必因制服強俄起見。并思阻撓法國助俄之勢力也。蓋就兵力以觀。東洋陸軍以日本爲最。西洋海軍以英國爲最。一旦有警。日本可于瞬息之間。調集陸軍。以壓亞洲大陸之全境。而海軍則又與英國結合。雄峙海上。得東洋諸要港以据之。則歐西列強必無容足之地。是誠爲各國之隱憂。抑亦國于東亞者之所宜戒懼也。英日兩國雖以保全中韓爲名。然其所企

圖。惟在自利而已。豈真能糜財力費精神而爲我國強乎。故兩國之聯盟。不必即謂爲有利于中國也。夫國于今日之地球上者。要在兵力財力二端。不待言矣。以本國之土地。必藉他國聯盟以保全之。恥辱孰甚。欲免此恥辱。惟在變法自強。練兵裕財。固我疆土。必使一國防禦之事。皆藉本國之實力。他國聯約。一無可恃。臣深望陛下勵精求治。以自振拔也。雖然。英日兩國之期望。有與我中國適相吻合者。如寸地尺港。不得割付他國之類。是也。此亦因其商利起見。特托此以自戒耳。要之中國處此艱難之局。必一面行新法以自強。明教育以自衛。一面藉兩國聯盟之勢。乘勢利用之。是爲中國目前之第一政策矣。云云。

◎急催變法。聞直督袁世凱面詰政務處諸員曰。政務處爲變法而設也。今諸公尙不速籌變法。欲何待乎。某員對曰。正在商量。袁曰。今何時而尙以商量二字搪塞耶。恐國家岌岌。不及待君輩商量矣。

◎翰林笑話。聞有翰林若干人。聯名呈請堂官代奏。略謂江鄂各督奏議。擬遣學生赴日本學習小學中學師範。及由駐日使臣轉托日本參謀部文部陸軍省。代我籌計

酌擬大中小各學各種速成教法。以應急需等事。皆與中國體面有損。中國進士舉貢不下百萬人。反求學堂教法于日本。實爲中國之大恥。云云。堂官躊躇再三。將原呈擲還。批云。既不如人。又不服善。實屬無恥之尤。即飭勿復。

◎推廣銀行 聞近日政府之意。在推廣銀行爲急務。其辦法章程。與夫行用鈔票。大約同中國通商銀行。

◎募軍確信 聞袁世凱擬將部下全軍悉數調至畿疆。爲拱衛神京之用。擬大名駐扎四營。正定四營。餘各分扎近畿。山東地勢空虛。則另由東撫招募四十餘營。共二萬人。以實營伍。

◎直督舉動 聞直督袁世凱在保定廣開學校。平治道塗。擬招新軍四萬人。于三月招齊備練。極力爲之。惟恐不及。至所用款項。即前奏賑捐所得之一百萬。

◎阻派遊學 現駐日本欽使蔡鈞氏。近嘗致電入京。請勿派學生前往日本學習。蓋防其沾染自由習氣。聞慶親王並王中堂等業已電請江督劉坤一依從前議。

◎甘肅亂耗 聞甘肅地方。大有不靖之勢。聲言董大帥欲仍與外國爲難。附和日衆。

已成星火。陝甘總督暨固原提督于前月十五日曾電知軍機處矣。或曰甘肅民情久已蠢蠢欲動。此番又擬裁撤鄧軍。風說益甚。故黠者乘間即發。而政府得電後。即令緩裁鄧軍。勿致張皇滋事云。

◎俄約述聞 聞俄人已有成說。所有東三省五金礦產。俄人將來當會同英美德法四國公辦。以應利益均霑之旨。已派呂海寰盛宣懷兩氏參酌各國情形。妥議具奏。又以俄人與李文忠楊侍郎皆有密約。故命李文忠公子經邁隨同慶親王往見俄使。相助爲理。並命楊侍郎之子在俄京候俄政府簽字。如有異議。即行電聞。簽字之後。東三省便可交還中國。或云。經邁亦須至俄與前俄使格蘭斯商議一切。至日本將來有無異議。政府已不暇計及矣。

◎俄使之言 聞日前俄使晉謁慶邸。談次極言西藏喇嘛應聽其爲自主獨立之國。按去年俄人曾以頭等公使之禮接待藏使。今又坦言之。其意何如。蓋可知矣。

◎俄人恫喝 俄人現因滿約特爲恫喝之詞。謂中朝若不將滿約辦理妥當。俄雖不強逼。然萬一因此而碍于英日兩國之處。除戰爭外。更無別策。是中國必至自招滅

亡而後已。

◎俄營煤礦 聞俄國于預算費內。特備一百五十萬羅卜。開辦齊齊哈爾煤礦之用。

然聞中政府因俄人欲在滿洲開礦。據爲一己之利。已力拒甚決。

◎俄人要求 俄國現要求中政府。請將願用英日兩國員弁裁減人數。至所索牛莊鐵路之賠償款。仍須增加一百五十萬兩。

◎都署難裁 天津都署。雖喧傳限至西歷四月一日裁撤。然據傳聞。謂此次駐京各使臣與袁世凱會議。都署存廢一節。袁雖主裁撤之見甚堅。絕無氣餒。然不料從前力主裁撤之各使臣。今亦一旦翻然改悔。且因英日聯盟之舉。既定此後東亞變態如何。未可逆料。故皆力主維持。並聞決定此後最少亦須續辦一年。蓋以會議時英德兩使。力反裁撤之議。持論尤烈。

◎議開東礦 前報載駐京德使有請外務部許給德人在東省開辦某某礦地利權。而以礦中出息十分之七。付與中國政府一節。茲聞德政府實無此意。不過有在東省之德國礦務公司。曾于一千八百九十九年。索取山東礦利數處。現該公司派有人員。

兼得德使館之助。會議開辦該礦事務。惟此事尙難議定。因東撫向之索取稅銀公司。非特不允。且欲將舊有礦地。亦不照納之故。並悉德國若成此議。則將來各國在中國開礦之事。皆獲利益矣。

◎天津問題。聞各使臣于天津之議。當由全權大臣照會。不當由北洋大臣索還。并云全權須各國送一照會。誰願撤兵。則可先行。若只照會一領銜公使。必須彼此會商。一國不願。則牽動全局。故全權現正議致送各國之照會云。

◎交路無期。關內外鐵路前有交還中國之說。現得實在消息。英國尙無交還之議。並聞掌管鐵路英官。已于日前將各局理事華人。多定以六個月合同。並優加薪水。俾得安心供職云。

海外彙報

半月大事記 西歷三月
上半月

▲一日路透電。據二月廿八日所報。英軍兩日來在某處與杜兵疊次接仗。前後共陣殺並俘獲敵兵六百餘人外。又奪得戰馬二千匹。牲畜二萬八千頭。杜將底威特之子並秘書官一人。均在此次被據之列云。

同日電。法國首相華特克盧騷。因乘車公出。途次與電車相撞。致座車翻覆。身受重傷。現已稍痊。

同日電。基將軍信稱英軍前在某處曾被杜兵擄去官弁十六人。兵勇四百五十一人。茲有一百六十人業經放回。惟某營管帶副將恩德森仍被拘留。

同日倫敦電。印度般拉畢地方。近日黑死病甚猖獗。一日死亡之數。以數千計云。同日電。據各私報。俄國學生動搖之事。現莫斯科大學之周圍。皆築壘而將。為激烈之爭鬪。至其詳細。現尙未知。

同日伯林電。美國各屬接待亨利親王之禮。頗爲優渥。伯林官報極嘉許之。即各日報亦均稱贊該親王與美總統等問答之詞。並各日報請其宴飲時宣言之事云。

同日電。法國明年之預算表中。尙缺少一百七十五兆佛郎。蓋較今年已增一倍矣。

▲三日路透電。南非洲克刺克斯陶巴護衛兵隊之役。除前電紀其死傷之數外。尙有兵弁五人。兵丁四十五人。死于是役。其受傷者尙有兵弁二人云。

同日電。馬康尼氏現在英國某處公司船上。約距英國一千五百五十英里之遙。得接由康哇爾地無線電報寄到此項電報。將來諒能遍及地球矣。

▲四日路透電。據基將軍信稱。副將恩德森前在某處遇敵擊敗。並失空車一輛。茲已同其部下將官九人。兵勇二百四十五人回營。

同日電。基將軍信稱。前禮拜內杜兵陣亡者共八十四人。被擄及投誠者共一千零八人。

同日電。英兵部大臣云。南非洲軍前應用之戰馬。本大臣並無少懷吝嗇。稍爲節制。且近三十個月內。所有牲畜或從事他處運往。或在就地購買。前後共計已有五十

五萬匹云。

同日電。德相步陸伯爵。在議院宣言。我德國在東亞政策。自英日聯盟後。毫不改動。緣此事。于德國利益。並不碍我德國。亦不欲在中韓兩國。侵佔土地。惟須保護我之商業。與一切權利而已。至于山東等處。不過作爲各國通商口岸。我德國並非獨擅其利權也。蓋我德國原不欲在中國。沾有利益。惟須與各國不相上下耳。

同日柏林電。美國文部大臣。現欲將亨利親王至美之事。編紀一書。其所以著此書之故。並非于政治上有所指斥。實因德人向在美國經商。此次該親王來美。兩國交誼愈形聯絡。並以美人接待該親王之禮。甚爲優厚。故著此書以誌欣幸。

同日電。各國會議糖稅之約。現已簽字。所有將來出口糖稅。槩行豁免。其進口稅。自一千九百三年起。僅徵佛郎六枚云。

▲五日路透電。據司丹達報訪事信稱。日前英軍護送糧車。遇敵擊敗。車爲所奪。先英軍嘗擊退杜兵兩次。嗣因敵軍三面圍攻。衝突入陣。英軍隊伍始被截散。間有某營之兵。猶能奮勇苦戰。奪路而出。惜終被敵獲。是役杜兵死者三十人。傷二十八人。

同日電。英兵部大臣在下議院出估計本年陸軍費用時。嘗云。陸軍兵勇將來當歸常備兵籍三年。後備兵籍九年。其薪糧自日一先零增至十八便士爲止。

同日倫敦電。英人考爾樞哈君。日前在中央亞洲會演說英國于東方政策。謂波斯灣于英國之關係。與數年前在北直隸不相上下。並謂現在英國所行政策。竊恐印度東邊界大有危險之狀。似宜將印度鐵路推廣至守斯吞及彭達辣排斯等處。或可免于危險。否則難以設想也。

同日電。俄國各報以日人至滿洲者日多。深爲不平。特著論說言日人至東三省之意。實係爲間諜起見也。

同日電。歐洲土耳其之北修維爾爾國京都。今日有亂匪圖謀不軌而不成。匪首業已就擒正法。從匪之被獲者亦不少。

同日電。美國紐約省議政局。刻已將嚴辦無君黨之律例頒行。

▲六日海牙電。日前波亞黨專使在荷京海牙府聚集會議一切。並稱謝荷政府願出爲調停戰事一節。彼等謂日下英政府之意。仍欲將我杜國隸于英屬。故波亞黨亦

不能與英會議一切也。

同日路透電。美總統羅斯維及其宰相。已于日前接見波亞黨專使哇馬拉姆斯及威瑟爾斯二君。以私見禮相待。美總統聽該二使言論要事。至十五分鐘後。即言我美國實不能効力。亦不欲干預南非洲戰事。

▲七日路透電。英杜南非克刺克斯陶巴之役。英兵之被拘者。除前已釋放外。現又釋回一百餘人。照常在營聽用矣。

▲八日路透電。法國外部大臣近在議院宣言曰。英日兩國聯盟。意在保全中國而已。我法在遠東之政策。因亦無事更張也。

▲九日華盛頓電。前者美總統女公子擬赴倫敦慶賀英皇加冕之禮。茲不果行。同日電。菲律賓巡撫忒夫脫君。在美京與政府會議菲律賓一切事宜。並言甚望美國于一千九百零四年以內許菲律賓爲自治之國。不爲干預。

▲十日路透電。英皇將于日內至法國彌斯地方游覽。尙須往巴黎京城駐蹕兩日。與法總統相會云。

同日電。基將軍電稱副將林明敦近獲得馬亨尼槍彈三十萬顆。李密甫槍彈一萬顆。另又開花彈並開花信子數百個。機器砲一尊。

同日電。菲律賓稅章已經美總統簽押。

同日電。英將軍梅士恩同其所部弁兵二百餘人。並砲四尊。及他輜重等。已于七日時被杜將底刺利悉行擒獲。

同日電。梅士恩將軍臂一受傷。已被敵軍俘獲。是役英軍中死有四十人。傷有八十人。此外被擒者尚有多人。

▲十一日路透電。梅士恩將軍腿際受傷。現在拘禁杜營。杜人待之頗善。是役英軍陣亡人數。官兵合計有三十八人。受傷者官有五員。兵有七十二名。此外另有二百餘人。皆查無下落。梅將軍是日所部之兵。共一千二百人。杜軍有一千五百人。其所穿之號衣。幾與英軍無異。

同日電。英兵部大臣在下議院宣言。茲有鄉勇兵六千名。下月當可附輪前往南非洲。另有大隊馬兵步兵並戰馬等。均已齊備。

同日電。英下議院得讀基將軍稟報梅士恩統領失利之信。衆多譏笑愛爾蘭民籍之無用。蓋梅士恩本籍隸愛爾蘭省云。

同日柏林電。俄人現在聲明此次各國因美國措置西班牙政策不善。大加訾議一事。並非俄人主見。實係英國駐美公使引誘各國所致。

同日電。俄政府刻向法國訂借佛郎四百兆枚。即以中國應償俄國賠款作抵。

▲十二日路透電。歐洲各國聞梅士恩統領在南非洲敗績之信。無不爲之憐惜。所議者惟有數家不甚著名之新報耳。

同日電。英皇從各大臣之請。業已諭告愛爾蘭某爵紳。謂朕同皇后本年弗及臨幸愛爾蘭省。心甚歉焉。

▲十三日路透電。尼加拉運河之案。美國下院議已經議准矣。

同日電。敵將底威特及斯它銀兩人。以上一禮拜日入夜在倭威士托之北。橫斷鐵路。造於西方。或曰兩人將投多拉列軍也。

同日電。英國陸軍大臣普羅多列演說。梅士恩將軍約以本日到克刺克斯陶巴。其

病已稍全愈云。

▲十五日路透電。英國皇帝所以罷論臨幸愛爾蘭者。固由下議院愛爾蘭議員之舉動。而亦因愛爾蘭黨激昂殊甚。往遊其地。殊無趣也。

同日倫敦電。白疊斯福卿在倫敦商業會議所。因國防設備之事。極言行政衙門之無能。大倡改革之說云。

同日電。據在梳林之試驗。破潛水艇。斷非難事也。

